



禮志四之四第十三

魏書一百八

世宗永平四年冬十二月負外將軍兼尚書都令史陳終德有祖母之喪欲服齊衰三年以無世爵之重不可陵諸父若下同衆孫恐違後祖之義請求詳正國子博士孫景苞劉懷義封軌高綽太學博士袁昇四門博士陽寧居等議嫡孫後祖持重三年不爲品庶生二終德宜先諸父太常卿劉芳議案喪服乃士之正禮含有天子諸侯卿大夫之事其中時復下同庶人者皆別標顯至如傳重自士以上古者卿士咸多世位又士以上乃有宗廟世儒多云嫡孫傳重下通庶人以爲差謬何以

明之禮稽命徵曰天子之元士二廟諸侯之上士亦二廟中士一廟一廟者祖禰共廟祭法又云庶人無廟既如此分明豈得通於庶人也傳重者主宗廟非謂庶人祭於寢也兼累世承嫡方得爲嫡子嫡孫耳不爾者不得繼祖也又鄭玄別變除云爲五世長子服斬也魏晉以來不復行此禮矣案喪服經無嫡孫爲祖持重三年正文唯有爲長子三年嫡孫替傳及注因說嫡孫傳重之義今世既不復爲嫡子服斬卑位之嫡孫不陵諸叔而持重則可知也且準終德資階方之於古未登下士庶人在官復無斯禮考之舊典驗之今世則茲範罕行且諸叔見存喪主有寄宜依諸孫服替爲允景邕等又議云喪服雖以士爲主而必下包庶人何以論之自大夫以下每條標列逮於庶人含而不述比同士制起後疑也唯有庶人爲國君此則明義服之輕重不涉於孫祖且受國於曾祖廢疾之祖父亦無重可傳而猶三年不必由世重也夫霜感露濡異識咸感承重主嗣寧甄寢廟嫡孫之制固不同殊又古自卿以下皆不殊承襲未代僭妄不可以語通典是以春秋譏於世卿王制稱大夫不世此明訓也喪服經雖無嫡孫爲祖三年正文而有祖爲嫡孫者豈祖以嫡服已已與庶孫同爲祖

服暮於義可乎服祖三年此則近世未嘗變也準古士官不過二百石已上終德卽古之廟士也假令終德未班朝次苟曰志仁必也斯遂況乃官歷士流當訓章之運而以庶叔之嫌替其嫡重之位未是成人之善也芳又議國子所云喪服雖以士爲主而必下包庶人本亦不謂一篇之內全不下同庶人正言嫡孫傳重專士以上此經傳之正文不及庶人明矣戴德喪服變除云父爲長子斬自天子達於士此皆士以上乃有嫡子之明據也且承重者以其將代已爲宗廟主廟主了不云寢又其證也所引大夫不世者此公羊穀梁近儒小道之

書至如左氏詩易尚書論語皆有典證或是未寤許叔重五經異義云今春秋公羊穀梁說卿大夫世位則權并一姓謂周尹氏齊崔氏也而古春秋左氏說卿大夫皆得世祿傳曰官族易曰食舊德舊德謂食父故祿也尚書曰世選尔勞予不絕尔善詩云惟周之士不顯弈世論語曰興滅國繼絕世國謂諸侯世謂卿大夫也斯皆正經及論語士以上世位之明證也士皆世祿也八品者一命斯乃信然但觀此據可謂覩其綱未照其目也案晉官品令所制九品皆正無從故以第八品準古下士今皇朝官令皆有正從若以其員外之資爲第十

六品也豈得爲正八品之士哉推考古今謹如前議景
邕等又議喪服正文大夫以上每事顯列唯有庶人含
而不言此通下之義了然無惑且官族者謂世爲其功
食舊德者謂德侯者世位興滅國繼絕世王謂諸侯卿
大夫無罪誅絕者耳且金貂七旒楊氏四公雖以位相
承豈得言世祿乎晉太康中令史殷遂以父祥不及所
繼求還爲祖母三年時政以禮無代父追服之文亦無
不許三年之制此卽晉世之成規也尚書邢巒奏依芳
議詔曰嫡孫爲祖母禮令者處士人通行何勞方致疑
請也可如國子所議

延昌二年春偏將軍乙龍虎喪父給假二十七月而虎
并數閏月詣府求上領軍元珍上言案違制律居二年
之喪而冒哀求仕五歲刑龍虎未盡二十七月而請宿
衛依律結刑五歲三公郎中崔鴻駁曰三年之喪二十
五月大祥諸儒或言祥月下旬而禫或言二十七月各
有其義未知何者會聖人之旨龍虎居喪已二十六月
若依王杜之義便是過禫卽吉之月如其依鄭玄二十
七月禫中復可以從御職事禮云祥之日鼓素琴然則
大祥之後喪事終矣旣可以從御職事求上何爲不可
若如府判禫中鼓琴復有罪乎求之經律理實未允下

更詳辨珍又上言案士虞禮三年之喪朞而小祥又朞而大祥中月而禫鄭玄云中猶間也自喪至此凡二十七月又禮言祥之日鼓素琴鄭云鼓琴者存樂也孔子祥後五日彈琴而不成十日而成笙歌鄭注與鄭志及踰月可以歌皆身自逾月可爲此謂存樂也非所謂樂樂者使工爲之晉博士許猛解三驗曰案黍離麥秀之歌小雅曰君子作歌惟以告哀魏詩曰心之憂矣我歌且謠若斯之類豈可謂之金石之樂哉是以徒歌謂之謠徒吹謂之和記曰比音而樂之及干戚羽毛謂之樂若夫禮樂之施於金石越於聲音者此乃所謂樂也至

於素琴以示終笙歌以省哀者則非樂矣閒傳云大祥除衰杖而素縞麻衣大祥之服也雜記注云衣黃裳則是禫祭黃者未大吉也檀弓云祥而縞是月禫徙月樂鄭志趙商問鄭玄荅云年謂大祥二十五日是月禫謂二十七月非謂上祥之月也徙月而樂許猛釋六徵曰樂者自謂八音克諧之樂也謂在二十八日工奏金石之樂耳而駁云大祥之後喪事終矣脫如此駁禫復焉施又駁云禫中鼓琴復有罪乎然禫則黃裳未大吉也鼓琴存樂在禮所許若使工奏八音融然成韻既未徙月不罪伊何又駁云禫中旣得從御職事求上何爲不

可檢龍虎居喪二十六月初始是素縞麻衣大祥之中何謂禫乎三年沒閏理無可疑麻衣在體冒仕求榮寔爲大尤罪其焉捨又省依王杜禫祥同月全乖鄭義喪凶尚遠而欲速除何忽忽者哉下府愚量鄭爲得之何者禮記云吉事尚近日凶事尚遠日又論語云喪與其易寧戚而服限三年痛盡終身中月之解雖容二義尚遠寧戚又檢王杜之義起於魏末晉初及越騎校尉程猗贊成王肅駁鄭禫二十七月之失爲六徵三驗上言於晉武帝曰夫禮國之大典兆民所日用豈可二哉今服禫者各各不同非聖世一統之謂鄭玄說二十七月禫

甚乖大義臣每難鄭失六有徵三有驗初未能破臣難而通玄說者如猗之意謂鄭義廢矣太康中許猛上言扶鄭釋六禫解三驗以鄭禫二十七月爲得猗及王肅爲失而博士宋昌等議猛扶鄭爲乘晉武從之王杜之義於是敗矣王杜之義見敗者晉武知其不可行故也而上省同猗而贊王欲虧鄭之成軌竊所未寧更無異義還從前處鴻又駁曰案三年之喪沒閏之義儒生學士猶或病諸龍虎生自戎馬之鄉不蒙稽古之訓數月成年便懼違緩原其本非貧榮求位而欲責以義方未可便尔也且三年之喪再暮而大祥中月而禫鄭玄以

中爲閒王杜以爲是月之中鄭亦未爲必會經旨王杜
豈於必乖聖意旣諸儒探賸先聖後賢見有不同晉武
後雖從宋昌許猛之駁同鄭禫議然初亦從程猗贊成
王杜之言二論得否未可知也聖人大祥之後鼓素琴
成笙歌者以喪事旣終餘哀之中可以存樂故也而樂
府必以干戚羽毛施之金石然後爲樂樂必使工爲之
庶民凡品於祥前鼓琴可無罪乎律之所防豈必爲貴
士亦及凡庶府之此義彌不通矣魯人朝祥而暮歌孔
子以爲踰月則可矣亦則大祥之後喪事已終鼓琴笙
歌經禮所許龍虎欲宿衛皇宮豈欲合刑五歲就如鄭

義二十七月而禫二十六日十五升布深衣素冠縞紕
及黃裳綵纓以居者此則三年之餘哀不在服數之內
也衰經則埋之於地杖則棄之隱處此非喪事終乎府
以大祥之後不爲喪事之終何得復言素琴以示終也
喪事尚遠日誠如鄭義龍虎未盡二十七月而請宿衛
實爲忽忽於戚之理合在情責便以深衣素縞之時而
罪同杖經苦凶之日於禮憲未允詳之律意冒喪求仕
謂在斬焉草土之中不謂除衰杖之後也又龍虎具列
居喪日月無所隱冒府應告之以禮遣還終月便幸彼
昧識欲加之罪豈是遵禮敦風愛民之致乎正如鄭義

龍虎罪亦不合刑忽忽之失宜科鞭五十

三年七月司空清河王懌第七叔母北海王妃劉氏薨
司徒平原郡開國公高肇兄子太子洗馬員外亡並上
言未知出入猶作鼓吹不請下禮官議決太學博士封
祖胄議喪大記云暮九月之喪既葬飲酒食肉不與人
樂之五月三月之喪比葬飲酒食肉不與人樂之世叔
母故主宗子直云飲酒食肉不言不與人樂之鄭玄云
義服恩輕以此推之明義服葬容有樂理又禮大功言
而不議小功議而不及樂言論之間尚自不及其於聲
作明不得也雖復功德樂在宜止四明博士蔣雅哲議

凡三司之尊開國之重其於王服皆有厭絕若尊同體
敵雖疏尚宜徹樂如或不同子姓之喪非嫡者既殯之
後義不闕樂國子助教韓神固議闕字一可以展耳目之

適絲竹可以肆遊宴之娛故於樂貴縣有哀則廢至若
德儉如禮升降有數文物昭旂旗之明錫鸞爲行動之
響列明貴賤非措哀樂於其間矣謂威儀鼓吹依舊爲
允兼儀曹郎中房景先駁曰案祖胄議以功德有喪鼓
吹不作雅哲議齊衰卒哭簫管必陳準之輕重理用未
安聖人推情以制服據服以副心何容拜虞生之奠於
神宮襲衰麻而奏樂大燧一移哀情頓盡反心以求豈

制禮之意也就如所言義服恩輕既虞而樂正服一基
何以爲斷或義服尊正服卑如此之比復何品節雅哲
所議公子之喪非嫡者既殯之後義不闕樂案古雖有
尊降不見作樂之文未詳此據竟在何典然君之於臣
本無服體但恩誠相感致存隱惻是以仲遂卒垂笙簫
不入智悼在殯杜蕢明言豈大倫之痛既殯而樂乎又
神固等所議以爲笳鼓不在樂限鳴鐃以警衆聲笳而
清路者所以辨等列明貴賤耳雖居哀恤施而不廢粗
而言之似如可通考諸正典未爲符合案詩云鍾鼓既
設鼓鍾伐馨又云於論鼓鍾於樂辟雍言則相連豈非

樂乎八音之數本無笳名推而類之簫管之比豈可以
名稱小殊而不爲樂若以王公位重威節宜崇鼓吹公
給不可私辭者魏絳和戎受金石之賞鍾公勳茂蒙五
熟之賜若審功膺賞君命必行豈可陳嘉牢於齊殯之
時擊鍾磬於闕附之後尋究二三未有依據國子職兼
文學令問所歸宜明據典謨曲盡斟酌率由必衷以辨
深惑何容總議並申無所析剖更詳得失據典正議秘
書監國子祭酒孫惠蔚太學博士封祖胄等重議司空
體服衰麻心懷慘切其於聲樂本無作理但以鼓吹公
儀致有疑論耳案鼓吹之制蓋古之軍聲獻捷之樂不

常用也有重位茂勲乃得備作方之金石準之管絃其
爲音奏雖曰小殊然其大體與樂無異是以禮云鼓無
當於五聲五聲不得和竊惟今者加台司之儀蓋欲
兼廣威華若有哀用之無變於吉便是一人之年悲樂
並用求之禮情於理未盡二公雖受之於公用之非私
出入聲作亦以娛已今既有喪心不在樂笳鼓之事明
非欲聞其從寧戚之義廢而勿作但禮崇公卿出入之
儀至有趨以采齊行以肆夏和鑾之聲佩玉之飾者所
以顯槐鼎之至貴彰宰輔之爲重今二公地處尊親儀
殊百辟鼓吹之用無容全去禮有懸而不樂今陳之以

備威儀不作以示哀痛述理節情愚謂爲允詔曰可從
國子後議

清河王懌所生母羅太妃薨表求申齊衰三年詔禮官
博議侍中中書監太子少傅崔光議喪服大功章云公
之庶昆弟爲母傳曰先君餘尊之所厭不得過大功記
公子爲其母練冠麻衣繚緣旣葬除之傳曰何以不在
五服中也君之厭不得申其罔極依禮大功據喪服厭
降之例並無從厭之文今太妃旣捨六宮之稱加太妃
之號爲封君之母尊崇一國臣下固宜服朞不得以王
服厭屈而更有降禮有從輕而重義包於此太學博士

封偉伯等十人議案臣從君服降君一等君爲母三年臣則朞今司空以仰厭先帝俯就大功臣之從服不容有過但禮文殘缺制無正條竊附情理謂宜小功庶君臣之服不失其序升降之差頗會禮意清河國郎中令韓子熙謹案喪服大功章云公之庶昆弟爲其母妻傳曰何以大功先君餘尊之所厭不敢過大功也夫以一國之貴子猶見厭況四海之尊固無申理頃國王遭太妃憂議者援引斯條降王之服尋究義例頗有一途但公之庶昆弟或爲士或爲大夫士之卑賤不得仰匹親王正以餘厭共同可以奪情相擬然士非列士無臣從

服今王有臣復不得一準諸士矣議者仍令國臣從服以朞朞昧所見未曉高趣案不杖章云爲君之父母妻長子祖父母傳曰父母長子君服斬妻則小君父卒然後爲祖後者服斬傳所以深釋父卒爲祖服斬者蓋恐君爲祖朞臣亦同朞也明臣之後朞由君服斬若由君服斬然後朞則君服大功安得亦朞也若依公之庶昆弟不云有臣從朞若依爲君之父母則出應申三年此之二章殊不相干引彼則須去此引此則須去彼終不得兩服功朞渾雜一圖也議者見餘尊之厭不得過大功則令王依庶昆弟見不杖章有爲君之父母便令臣

從服以朞此乃據殘文守一隅恐非先聖之情達禮之喪矣且從服之體自有倫貫雖秩微闈寺位卑室老未有君服細絰裁踰三時臣著䟽衰獨涉兩歲案禮天子諸侯之大臣唯服君之父母妻長子祖父母其餘不服也唯近臣闈寺隨君而服耳若大夫之室老君之所服無所不從而降一等此三條是從服之通旨較然之明例雖近臣之賤不過隨君之服未有君輕而臣服重者也議者云禮有從輕而重臣之從君義包於此愚謂服問所云有從輕而重公子之妻爲其皇姑直是禮記之異獨此一條耳何以知其然案服問經云有從輕而重

公子之妻爲其皇姑而大傳云從服有六其六曰有從輕而重注曰公子之妻爲其皇姑若從輕而重不獨公子之妻者則鄭君宜更見流輩廣論所及不應還用服問之文以釋大傳之義明從輕而重唯公子之妻臣之從君不得包於此矣若復有君爲母大功臣從服朞當云有從輕而重公子之妻爲其皇姑爲母大功臣從服朞何爲不備書兩條以杜將來之惑而偏著一事彌結今日之疑且臣爲君母乃是徒從徒從之體君亡則已妻爲皇姑旣非徒從雖公子早沒可得制服乎爲君之父母妻子君已除喪而後聞喪則不稅蓋以恩輕不

能追服假令妻在遠方姑沒遙域過暮而後聞喪復可不稅服乎若姑亡必不關公子有否聞喪則稅不許日月遠近者則與臣之從君聊自不同矣又案臣服君黨不過五人悉是三年其餘不服妻服夫黨可直五人乎暮功以降可得無服乎臣妻事殊邈然胡越苟欲引之恐非通例也愚謂臣有合離三課待決妻無去就一醮終身親義既有參差喪服固宜不等故見厭之婦可得申其本服君屈大功不可過從以暮所以從麻而齊專屬公子之妻隨輕而重何關從服之臣尋理求途儻或在此必以臣妻相準未覩其津也子熙誠不能遠探墳

籍田論長智請以情理校其得失君遭母憂巨創之痛臣之爲服從君之義如何君至九月便蕭然而卽吉臣猶暮年仍哀哭於君第創巨而反輕從義而反重緣之人情豈曰是哉侍中崔光學洞今古達禮之宗頃探幽立義申三年之服雖經典無文前儒未辨然推例求旨理亦難奪若臣服從暮宜依侍中之論脫君仍九月不得如議者之談耳嬴氏焚坑禮經殘缺故今追訪靡據臨事多惑愚謂律無正條須準傍以定罪禮闕舊文定準類以作憲禮有暮同總功而服如齊疏者蓋以在心實輕於義乃重故也今欲一依喪服不可從君九月而

服周年如欲降一等兄弟之服不可以服君母詳諸二途以取折衷謂宜麻布可如齊衰除限則同小功所以然者重其衰麻尊君母感其日月隨君降如此衰麻猶重不奪君母之嚴日月隨降可塞從輕之責矣尚書李平奏以謂禮臣爲君黨妻爲夫黨俱爲從服各降君夫一等故君服三年臣服一朞今司空臣憚自以尊厭之禮奪其罔極之心國臣厭所不及當無隨降之理禮記大傳云從輕而重鄭玄注亡公子之妻爲其皇姑既舅不厭婦明不厭者還應服其本服此則是其例詔曰禮有從無服而有服何但從輕而重乎憚今自以厭故不得申其過隙衆臣古無疑厭之論而有從輕之據曷爲不得申其本制也可從尚書及景林等議尋詔曰比決清河國臣爲君母服朞以禮事至重故追而審之今更無正據不可背章生條但君服既促而臣服仍遠禮緣人情遇厭須變服可還從前判既葬除之

四年春正月丁巳夜世宗崩于式乾殿侍中中書監太子少傅崔光侍中領軍將軍于忠與詹事王顯中庶子侯剛奉迎肅宗於東宮入自萬歲門至顯陽殿哭踊久之乃復王顯欲須明乃行卽位之禮崔光謂顯曰天位不可暫曠何待至明顯曰須奏中宮光曰帝崩而太子

立國之常典何須中宮令也光與子忠使小黃門曲集
奏置兼官行事於是光兼太尉黃門郎元昭兼侍中顯
兼吏部尚書中庶子裴儁兼吏部郎中書舍人穆弼兼
謁者僕射光等請肅宗止哭立於東序子忠元昭扶肅
宗西面哭十數聲止服太子之服太尉光奉策進璽綬
肅宗跽受服皇帝用衮冕服御太極前殿太尉光等降
自西階夜直群官於庭中北面稽首稱萬歲

熙平二年十一月乙丑太尉清河王懌表曰臣聞百王
所尚莫尚於禮於禮之重喪紀斯極世代沿革損益不
同遺風餘烈景行終在至如前賢往詰商確有異或並

證經文而論情別緒或各言所見而討事共端雖憲章
祖述入自名家而論議紛綸理歸群正莫不隨時所宗
各為一代之典自上達下罔不遵用是使叔孫之儀專
擅於漢朝王肅之禮獨行於晉世所謂共同軌文四海
畫一者也至乃折旋俯仰之儀哭泣升降之節去來闔
巷之容出入閨門之度尚須疇諮禮官博訪儒士載之
翰帛著在通法辯荅乖殊證據不明卽詆訶疵謬糾劾
成罪此乃簡牒成文可具閱而知者也未聞有皇王垂
範國無一定之章英賢贊治家制異同之式而欲流風
作則永貽來世比學宮雖建庠序未修稽考古今莫專

其任暨乎宗室喪禮百寮凶事冠服制裁日月輕重率令博士一人輕介議之廣陵王恭北海王顥同爲庶母服恭則治重居廬顥則齊碁室論親則恭顥俱是帝孫語貴則二人並爲蕃國不知兩服之證據何經典俄爲舛駁莫有裁正懿王昵戚尚或如斯自茲已降何可紀極歷觀漢魏喪禮諸儀卷盈數百或當時名士往復成規或一代詞宗較然爲則况堂堂四海藹藹如林而令喪禮參差始於帝族非所以儀刑萬國綴旒四海臣忝官台傳備位喉膺不能秉國之鈞致斯爽缺具瞻所誚無所逃罪謹略舉恭顥二國不同之狀以明喪紀乖異之失乞集公卿樞納內外儒學博議定制班行天下使禮無異準得失有歸并因事而廣永爲條例庶塵岳沾河微酬萬一靈太后令曰禮者爲政之本何得不同如此可依表定議事在張晉慧傳

神龜元年九月尼高皇太后崩於瑤光寺肅宗詔曰崇憲皇太后德協坤儀徵符月晷方融壺化奄至崩殂朕幼集荼蓼夙憑德訓及翁薨定難是賴謨謀夫禮泐情制義循事立可特爲齊衰三月以申追仰之心有司奏案舊事皇太后崩儀自復魄斂葬百官哭臨其禮甚多今尼太后既存委俗尊憑居道法凶事簡速不依配極

之典庭局狹隘非容百官之位但昔經奉接義成君臣終始情禮理無廢絕輒準故式立儀如別內外群官權改常服單衣邪巾奉送至墓列位哭拜事訖而除止在京師更不宣下詔可

十一月侍中國子祭酒儀同三司崔光上言被臺祠部曹符文昭皇太后改葬議至尊皇太后群臣服制輕重四門博士劉季明議云案喪服記雖云改葬總文無指據至於注解乖異不同馬融王肅云本有三年之服者鄭及三重然而後來諸儒符融者多與玄者少今請依馬王諸儒之議至尊宜服總柔記外宗爲君夫人猶內

宗鄭注云爲君服斬夫人齊衰不敢以親服至尊也今皇太后雖上奉宗廟下臨朝臣至於爲姑不得過朞計應無服其清河汝南二王母服三年亦宜有總自餘王公百官爲君之母妻唯朞而已並應不服又太常博士鄭六議云謹檢喪服并中代雜論記云改葬總鄭注臣爲君子爲父妻爲夫親見屍柩不可以無服故服總三年者總則朞已下無服竊謂鄭氏得服總之旨謬三月之言如臣所見請依康成之服總既葬而除愚以爲允詔可

二年正月二日元會高陽王雍以靈太后臨朝太上秦

公喪制未畢欲罷百戲絲竹之樂清河王懌以爲萬國
慶集天子臨享宜應備設太后訪之於侍中崔光光從
雍所執懌謂光曰宜以經典爲證光據禮記緇冠玄武
子姓之冠父母有重喪子不純吉安定公親爲外祖又
有師恩太后不許公除衰麻在體正月朔日還家哭臨
至尊輿駕奉慰記云朋友之墓有宿草焉而不哭是則
朋友有暮年之哀子貢云夫子喪顏淵若喪子而無服
喪子路亦然顏淵之喪饋練肉夫子受之彈琴而後食
之若子之哀則容一暮不舉樂也孔子旣大練五日彈
琴父母之喪也由是喪夫子若喪父而無服心喪三年

由此而制雖古義難追比來發詔每言師祖之尊是則
一暮之內猶有

有喪服聲之所謂子不舉

樂今太后更無別宮所居嘉福去太極不爲大遠鼓鍾
于宮聲聞于外況在內密邇也君之卿佐是謂股肱股
肱或虧何痛如之智悼子喪未葬杜蕢所以諫晉平公
也今相國雖已安厝裁三月爾陵墳未乾懌以理證爲
然乃從雍議

孝靜武定五年正月齊獻武王薨時祕凶問六日孝靜
皇帝舉哀於太極東堂服齊衰三月及將窆中練齊文
襄王請自發喪之月帝使侍中陸子彰舉詔詔二往敦喻

王固執詔不許乃從慶月

太祖天賜三年十月占授著作郎王宜弟造兵法

高宗和平三年十二月因歲除大儺之禮遂燿兵示威更爲制令步兵陳於南騎士陳於北各擊鍾鼓以爲節度其步兵所衣青赤黃黑別爲部隊楯稍矛戟相次周回轉易以相赴就有飛龍騰蛇之變爲函箱魚鱗四門之陳凡十餘法踞起前却莫不應節陳畢南北二軍皆鳴鼓角衆盡大譟各令騎將六人去來挑戰步兵更進退以相拒擊南敗北捷以爲盛觀自後踵以爲常

高祖大和十九年五月甲午冠皇太子恂於廟丙申高

祖臨光極堂太子入見帝親詔之事在恂傳六月高祖臨光極堂引見群官詔曰比冠子恂禮有所闕當思往失更順將來禮古今殊制三代異章近冠恂之禮有三失一朕與諸儒同誤二諸儒違朕故令有三誤今中原兆建百禮惟新而有此三失殊以愧歎春秋襄公將至衛以同姓之國問其季幾而行冠禮古者皆灌地降神或有作樂以迎神昨失作樂至廟庭朕以意而行拜禮雖不得降神於理猶差完司馬彪云漢帝有四冠一緇布二進賢三武弁四通天冠朕見家語冠頌篇四加冠公也家語雖非正經孔子之言與經何異諸儒忽司馬

彪志致使天子之子而行士冠禮此朝廷之失冠禮朕以爲有賓諸儒皆以爲無賓朕旣從之復令有失孔所云斐然成章其斯之謂太子太傅穆亮等拜謝高祖曰昔裴頠作冠儀不知有四裴頠尚不知卿等復何愧正光元年秋肅宗加元服時年十一旣冠拜太廟大赦改元官有其注

輿服之制秦漢已降損益可知矣魏氏居百王之末接分崩之後典禮之用故有闕焉太祖世所制車輦雖參采古式多違舊章今案而書之以存一代之迹

乘輿輦輅龍輦十六四衡轂朱班繡輪有雕虬文虎盤螭之飾龍首銜扼鸞爵立衡圓蓋華蟲金雞樹羽蛟龍游蘇建太常十有二旂畫日月升龍郊天祭廟則乘之乾象輦羽葆圓蓋華蟲金雞樹羽二十八宿天階雲罕山林雲氣仙聖賢明忠孝節義遊龍飛鳳朱雀玄武白虎青龍奇禽異獸可以爲飾者皆亦圖焉太皇太后皇太后皇后助祭郊廟則乘之

大樓輦輦十二加以玉飾衡輪雕綵與輦輅同駕牛十
小樓輦輦八衡輪色數與大樓輦同駕牛十二天子太
皇太后皇太后郊廟亦乘之

象輦左右鳳凰白馬仙人前却飛行駕二象羽葆旒蘇
龍旂旄麾其飾與乾象同太皇太后皇太后助祭郊廟
之副乘也

馬輦重級其飾皆如之績漆直輈六左右駢駕天子籍
田小祀時則乘之

卧輦其飾皆如之丹漆駕六馬皆赤圖畫太皇太后皇
遊觀輦其飾亦如之駕馬十五匹皆白馬朱鬣尾天子
法駕行幸巡狩小祀時則乘之

七寶旃檀刻鏤輦金薄隱起

馬輦天子二駕所乘或爲副乘

緇漆蜀馬車金薄華蟲隱起

輶軒駕駟金銀隱起出挽解合

步挽天子小駕遊宴所乘亦爲副乘

金根車羽葆旒畫輈輪華首綵軒交落左右駢太皇太
后皇太后皇后助祭郊廟籍田先蠶則乘之長公主大
貴公主封君諸王妃皆得乘但右駢而已太祖初皇太
子皇子皆鸞輅立乘畫輈龍首朱輪繡轂綵蓋朱裏龍
旂九旂畫雲棨皇子封則賜之皆駕駟又有輶車緇漆
紫幟朱裏駕一馬爲副乘

公安車緇漆紫蓋朱裏畫輈朱雀青龍白虎龍旂八旂

駕三馬輅車與王同更蓋神米餅青蒲白氣侯車與公同七旂紫蓋青裏駕二馬副車亦如之

子車緇漆草蠡文六旂皂蓋青裏駕一馬副車亦如之

闕及公侯子陪列郊天則乘之宗廟小祀乘輅軒而已

至高祖太和中詔儀曹令李韶監造車輅一遵古式焉

太祖天興二年命禮官摺採古事制三駕鹵簿一曰大

駕設五輅建太常屬車八十一乘平城令代尹司隸校

尉丞相奉引太尉陪乘太僕御從輕車介士千乘萬騎

魚麗鴈行前驅皮軒闐戟芝蓋雲罕指南後殿豹尾鳴

葭唱上下作鼓吹軍戎大祠則設之二曰法駕屬車三

十六乘平城令代尹太尉奉引侍中陪乘奉車都尉御

巡狩小祠則設之三曰小駕屬車十二乘平城令太僕

奉引常侍陪乘奉車郎御遊宴離宮則設之二至郊天

地四節祠五帝或公卿行事唯四月郊天帝常親行樂

加鍾懸以爲迎送之節焉

天賜二年初改大駕魚麗鴈行更爲方陳鹵簿列步騎

內外爲四重列櫛建旌通門四達五色車旗各處其方

諸王導從在鉀騎內公在幢內侯在步稍內子在刀楯

內五品朝臣使列乘輿前兩廂官卑者先引王公侯子

車旒麾蓋信幡及散官構服一皆純黑

肅宗熙平元年六月中侍中劉騰等奏中宮僕刺列車輿朽敗自昔舊都禮物頗異遷京已來未復更造請集禮官以裁其制靈太后令曰付尚書量議太常卿穆紹少卿元端博士鄭六劉臺龍等議案周禮王后之五輅重翟錫面朱總厭翟勒面纁總安車彫面鷺總皆有容蓋翟車貝面組總有握輦車組輓有翬羽蓋重翟后從王祭祀所乘厭翟后從王賓饗諸侯所乘安車后朝見於王所乘翟車后出桑則乘輦車后宮中所乘謹以周禮聖制不刊之典其禮文尤備孔子云其或繼周者雖百世可知也以其法不可踰以此言之後王輿服典章

多放周式雖文質時變輅名宜存彫飾雖異理無全捨當今聖后臨朝親覽庶政輿駕之式宜備典禮臣等學缺通經叨參議末輒率短見宜準周禮備造五輅彫飾之制隨時增減太學博士王延業議案周禮王后有五輅重翟以從王祠厭翟以從王饗賓客安車以朝見于王翟車以親桑輦車宮中所乘又漢輿服志云秦并天下閱三代之禮或曰殷瑞山車金根之色殷人以爲大輅於是始皇作金根之車漢承秦制御爲乘輿太皇太后皇太后皆御金根車加交絡帷裳非法駕則乘紫罽輶車雲襖文畫輶黃金塗五末蓋爪在右駢駕三馬阮

謀禮圖并載秦漢已來輿服亦云金根輅皇后法駕乘之以禮婚見廟乘輅后法駕乘之以親桑安車后小駕乘之以助祭山輅車后行則乘之紺罽輅車后小行則乘之以哭公主邑君王妃公侯夫人入閣輿后出入閣宮中小遊則乘之晉先蠶儀注皇后乘雲母安車駕六騮案周秦漢晉車輿儀式互見圖書雖名號小異其大較略相依擬金根車雖起自秦造卽殷之遺制今之乘輿五輅是其象也華飾典麗容觀莊美司馬彪以爲孔子所謂乘殷之輅卽此之謂也案阮氏圖桑車亦飾以雲母晉之雲母車卽是一與周之翟車其用正同安車

旣名同周制又用同重翟山輅車案圖飾之以紫紺罽輅車雖制用異於厭翟而實同用於今入閣輿與輦其用又同案圖今之黑漆畫扇輦與周之輦車其形相似竊以爲秦減周制百事剗革官名軌式莫不殊異漢魏因循繼踵仍舊雖時有損益而莫能反古良由去聖久遠典儀殊缺時移俗易物隨事變雖經賢哲祖襲無改伏惟皇太后叡聖淵凝照臨萬物動循典故貽則後王今輒竭管見稽之周禮考之漢晉採諸圖史驗之時事以爲宜依漢晉法駕則御金根車駕四馬加交絡帷裳御雲母車駕四馬以親桑其非法駕則御紫罽輅車駕

三馬小駕則御安車駕三馬以助祭小行則御紼屬軒
車駕三馬以哭公主王妃公侯夫人宮中出入則御畫
扇輦車案舊事比之周禮唯闕從王饗賓客及朝見於
王之乘竊以爲古者諸侯有朝會之禮故有從饗之儀
今無其事宜從省略又今之皇居宮掖相逼就有朝見
理無結駟卽事考實亦宜闕廢又哭公主及王妃周禮
所無施之於今寔合事要損益不同用捨隨時三代異
制其道然也又金根及雲母駕馬或三或六訪之經禮
無駕六之文今之乘輿又皆駕四義符古典宜仍駕四
其餘小駕宜從駕三其制用形飾備見圖志司空領尚

書令任城王澄尚書左僕射元暉尚書右僕射李平尚
書齊王蕭寶寅尚書元欽尚書元昭尚書左丞盧同右
丞元洪超考功郎中劉懋北主客郎中源子恭南主客
郎中游思進三公郎中崔鴻長兼駕部郎中薛院起部
郎中杜遇左主客郎中元鞞騎兵郎中房景先外兵郎
中石士基長兼右外兵郎中鄭幼儒都官郎中李秀之
兼尚書左士郎中朱元旭度支郎中谷頴左民郎中張
均金部郎中李仲東庫部郎中賈思同國子博士薛稹
邢晏高諒奚延太學博士邢湛崔瓚韋拙鄭季期國子
助教韓神固四門博士楊那羅唐荆寶王令儁吳珍之

宋婆羅劉燮高顯邕杜靈儁張文和陳智顯楊渴侯趙安慶賈天度艾僧樹呂太保王當百槐貴等五十人議以爲皇太后稱制臨朝躬親庶政郊天祭地宗廟之禮所乘之車宜同至尊不應更有製造周禮魏晉雖有文辭不辨形制假令欲作恐未合古制而不可以爲一代典臣以太常國子二議爲疑重集群官並從今議惟恩裁決靈太后令曰群官以後議折中者便可如奏

太祖天興元年冬詔儀曹郎董謐撰朝覲饗宴郊廟社稷之儀六年又詔有司制冠服隨品秩各有差時事未暇多失古禮世祖經營四方未能留意仍世以武力爲事取於便習而已至高祖太和中始考舊典以制冠服百寮六宮各有差次早世升遐猶未周洽肅宗時又詔侍中崔光安豐王延明及在朝名學更議之條章粗備焉

熙平元年九月侍中儀同三司崔光表奉詔定五時朝服案北京及遷都以來未有斯制輒勤禮官詳據太學博士崔瓚議云周禮及禮記三冠六冕承用區分瓌玉五綵配飾亦別都無隨氣春夏之異唯月令有青旂赤王黑衣白輅隨四時而變復不列弁冕改用之玄黃以此而推五時之冠禮旣無文若求諸正典難以經證案

司馬彪續漢書輿服及祭祀志云迎氣五郊自永平中以禮讖并月令迎氣服色因采元始故事兆五郊於洛陽又云五郊衣幘各如方色又續漢禮儀志立春京都百官皆着青衣服青幘秋夏悉如其色自漢逮于魏晉迎氣五郊用幘從服改色隨氣斯制因循相承不革冠冕仍舊未聞有變今皇魏憲章前代損益從宜五時之冠愚謂如漢晉用幘爲允靈太后令曰太傅博學洽通多識前載旣綜朝儀彌悉其事便可諮訪以決所疑二年九月太傅清河王懌給事黃門侍郎韋延祥奏謹案前勅制五時朝服嘗訪國子議其舊式太學博士崔瓚等議自漢逮于魏晉迎氣五郊用幘從服改色隨氣斯制因循相承不革冠冕仍舊未聞有變今皇魏憲章前代損益從宜五時之冠謂如漢晉用幘爲允尚書以禮式不經請訪議事奉勅付臣令加考決臣以爲帝王服章方爲萬世則不可輕裁請更集禮官下省定議蒙勅聽許謹集門下及學官以上四十三人尋考史傳量古校今一同國子前議幘隨服變冠冕弗改又四門博士臣王僧奇蔣雅哲二人以爲五時冠冕宜從衣變臣等謂從國子前議爲允靈太后令曰依議

禮志四之四第十三

魏書一百八

樂志五第十四

魏書一百九

氣質初分聲形立矣聖者因天然之有爲入用之物緣
喜怒之心設哀樂之器蕢桴葦箛其來自久伏羲絃琴
農皇制瑟垂鍾和磬女媧之簧隨感而作其用稍廣軒
轅桴阮瑜之管定小一之律以成咸池之美次以六莖
五英大章韶夏護武之屬聖人所以移風易俗也故在
易之豫義明崇德書云詩言志歌詠言聲依永律和聲
八音克諧神人以和周禮圜鍾爲宮黃鍾爲角大簇爲
徵沽洗爲羽鼙鼓鼙鼗孤竹之管雲和之琴瑟雲門之
舞奏之六變天神可得而降矣函鍾爲宮大簇爲角沽

洗爲徵南宮爲羽靈鼓靈鼗孫竹之管空桑之琴瑟咸池之舞奏之八變地示可得而禮矣黃鍾爲宮大呂爲角大蕤爲徵應鍾爲羽路鼓路鼗陰竹之管龍門之琴瑟九德之歌九磬之舞奏之九變人鬼可得而禮矣此所以協三才寧萬國也凡音宮爲君商爲臣角爲民徵爲事羽爲物五者不亂則無愆慝之音宮亂則荒其君驕商亂則陂其官壞角亂則憂其民怨徵亂則哀其事勤羽亂則危其財匱姦聲感人逆氣應之逆氣成象而淫樂興焉正聲感人順氣應之順氣成象而和樂興焉先王恥其亂故制雅頌之聲以道之使其聲足樂而不

流使其文足論而不息使其曲直繁瘠廉肉節奏足以感動人之善心而已不使放心邪氣得接焉樂在宗廟之中君臣上下同聽之莫不和敬在族長鄉里之中長幼同聽之莫不和順閨門之內父子兄弟同聽之莫不和親又有鞅昧任禁之樂以娛四夷之民斯蓋立樂之方也三代之衰邪音閒起則有爛漫靡靡之樂興焉周之衰也諸侯力爭澆僞萌生淫慝滋甚競其邪忘其正廣其器蔑其禮或奏之而心疾或撞之不令晉平公聞清角而顛隕魏文侯聽古雅而眠睡鄭宋齊衛流宕不反於是正樂虧矣大樂感於風化與世推移治國之音

安以樂亡國之音哀以思隨時隆替不常厥聲延陵歷聽諸國盛衰必舉蓋所感者著所識者深也樂之崩矣秦始滅學經亡義絕莫採其真人重協俗世貴順耳則雅聲古器幾將淪絕漢興制氏但識其鏗鏘鼓舞不傳其義而於郊廟朝廷皆協律新變雜以趙代秦楚之曲故王禹宋臯上書切諫丙強景武顯著當時通儒達士所共歎息矣後漢東平王蒼總議樂事頗有增加大抵循前而已及黃巾董卓以後天下喪亂諸樂亡缺魏武旣獲杜夔令其考會古樂而柴玉左延年終以新聲寵愛晉世荀勗典樂與郭夏宋識之徒共加研集謂爲合古而阮咸譏之金行不永以至亡敗哀思之來便爲驗矣夫大樂與天地同和苟非達識至精何以體其妙極自漢以後舞稱歌名代相改易服章之用亦有不同斯則不襲之義也永嘉已下海內分崩伶官樂器皆爲劉聰石勒所獲慕容儁平冉閔遂克之王猛平鄴入於關右苻堅旣敗長安紛擾慕容永之東也禮樂器用多歸長子及垂平永並入中山自始祖內和魏晉二代更致音伎穆帝爲代王愍帝又進以樂物金石之器雖有未周而絃管具矣逮太祖定中山獲其樂縣旣初撥亂未遑初改因時所行而用之世歷分崩頗有遺失

天興元年冬詔尚書吏部郎鄧淵定律呂協音樂及追尊皇曾祖皇祖皇考諸帝樂用八佾舞皇始之舞皇始舞太祖所作也以明開大始祖之業後更制宗廟皇帝入廟門奏王夏太祝迎神于廟門奏迎神曲猶古降神之樂乾豆上奏登歌猶古清廟之樂曲終下奏神祚嘉神明之饗也皇帝行禮七廟奏陸步以爲行止之節皇帝出門奏總章次奏八佾舞次奏送神曲又舊禮孟秋祀天西郊兆內壇西備列金石樂具皇帝入兆內行禮咸奏舞八佾之舞孟夏有事于東廟用樂略與西郊同太祖初冬至祭天于南郊圓丘樂用皇矣奏雲和之舞

事訖奏維皇將燎夏至祭地祇於北郊方澤樂用天作奏大武之舞正月上日饗羣臣宣布政教備列宮懸正樂兼奏燕趙秦吳之音五方殊俗之曲四時饗會亦用焉凡樂者樂其所自生禮不忘其本掖庭中歌真人代歌上叙祖宗開基所由下及君臣廢興之跡凡一百五十章昏晨歌之時與絲竹合奏郊廟宴饗亦用之六年冬詔太樂總章鼓吹增修雜伎造五兵角觝麒麟鳳皇仙人長蛇白象白虎及諸畏獸魚龍辟邪鹿馬仙車高絙百尺長趨緣橦跳丸五案以備百戲大饗設之於殿庭如漢晉之舊也太宗初又增修之撰合大曲更

爲鍾鼓之節世祖破赫連昌獲古雅樂及平涼州得其
伶人器服並擇而存之後通西域又以悅般國鼓舞設
於樂署

高宗顯祖無所改作諸帝意在經營不以聲律爲務古
樂音制罕復傳習舊工更盡聲曲多亡太和初高祖垂
心雅古務正音聲時司樂上書典章有闕求集中祕羣
官議定其事并訪吏民有能體解古樂者與之修廣器
數甄立名品以諧八音詔可雖經衆議於時卒無洞曉
聲律者樂部不能立其事彌缺然方樂之制及四夷歌
舞稍增列于太樂金石羽旄之飾爲壯麗於往時矣

五年文明太后高祖並爲歌章戒勸上下皆宣之管絃
七年秋中書監高允奏樂府歌詞陳國家王業符瑞及
祖宗德美又隨時歌謠不準古舊辨雅鄭也

十一年春文明太后令曰先王作樂所以和風改俗非
雅曲正聲不宜庭奏可集新舊樂章參探音律除去新
聲不典之曲禪增鍾縣鏗鏘之韻

十五年冬高祖詔曰樂者所以動天地感神祇調陰陽
通人鬼故能關山川之風以播德於無外由此言之治
用大矣逮乎末俗陵遲正聲頓廢多好鄭衛之音以悅
耳目故使樂章散缺伶官失守今方釐革時弊稽古復

禮庶令樂正雅頌各得其宜今置樂官寔須任職不得仍令濫吹也遂簡置焉

十六年春又詔曰禮樂之道自古所先故聖王作樂以和中制禮以防外然音聲之用其致遠矣所以通感人神移風易俗至乃簫韶九奏鳳皇來儀擊石拊石百獸率舞有周之季斯道崩缺故夫子忘味於聞韶正樂於返魯逮漢魏之間樂章復闕然博採音韻粗有篇條自魏室之興太祖之世尊崇古式舊典無墜但干戈仍用文教未淳故令司樂失治定之雅音習不典之繁曲比太樂奏其職司求與中書參議攬其所請愧感兼懷然

心喪在躬未忍關此但禮樂事大乃爲化之本自非通博之才莫能措意中書監高閭器識詳富志量明允每聞陳奏樂典頗體音律可令與太樂詳採古今以備茲典其内外有堪此用者任其參議也閭歷年考度粗以成立遇遷洛不及精盡未得施行尋屬高祖崩未幾閭卒

先是閭引給事中公孫崇共考音律景明中崇乃上言樂事正始元年秋詔曰太樂令公孫崇更調金石燮理音準其書二卷并表悉付尚書夫禮樂之事有國所重可依其請八座已下四門博士以上此月下旬集太樂

署考論同異博採古今以成一代之典也十月尚書李崇奏前被旨勅以兼太樂令公孫崇更調金石并其書表付外考試登依旨勅以去八月初詣署集議但六樂該深五聲妙遠至如仲尼淵識故將忘味吳札善聽方可論辨自斯已降莫有詳之今既草創悉不窮解雖微有詰論略無究悉方欲商榷滂濫作範將來寧容聊爾一試便垂竹帛今請依前所召之官并博聞通學之士更申一集考其中否研窮音律辨括權衡若可施用別以聞請制可時亦未能考定也

四年春公孫崇復表言伏惟皇魏龍躍鳳舉配天光宅

世祖太武皇帝草靜荒嶠廓寧宇內兇醜尚繁戎軒仍動制禮作樂致有闕如高祖孝文皇帝德鍾後仁之期道協先天之日顧雲門以興言感簫韶而忘味以故中書監高閭博識明敏文思優洽紹蹤成均寔允所寄乃命閭廣程儒林究論古樂依據六經參諸國志錯綜陰陽以制聲律鍾石管絃略以完具八音聲韻事別粗舉值遷邑崧瀍未獲周密五權五量竟不就果自爾迄今率多褫落金石虛懸宮商未會伏惟陛下至聖承天纂戎鴻烈以金石未協詔臣緝理謹卽廣搜柅黍選其中形又採梁山之竹更裁律呂制磬造鍾依律並就但權

量差謬其來久矣頃蒙付并州民王顯進所獻古銅權
稽之古範考以今制鍾律準度與權參合昔造猶新始
初若舊異世同符如合規矩樂府先正聲有王夏肆夏
登歌鹿鳴之屬六十餘韻又有皇始五行勺舞太祖初
興置皇始之舞復有吳夷東夷西戎之舞樂府之內有
此七舞太和初郊廟但用文始五行皇始三舞而已竊
惟周之文武頌聲不同漢之祖宗廟樂又別伏惟皇魏
四祖三宗道邁隆周功超鴻漢頌聲廟樂宜有表章或
文或武以旌功德自非懿望茂親雅量淵遠博識洽聞
者其孰能識其得失衛軍將軍尚書右僕射臣高肇器

度徽雅神賞入微淹讚大猷聲光海內宜委之監就以
成皇代典謨之美昔晉中書監荀勗前代名賢受命成
均委以樂務崇述舊章儀刑古典事光前載豈遠乎哉
又先帝明詔內外儒林亦任高閭申請今之所須求依
前比世宗知肇非才詔曰王者功成治定制禮作樂以
宣風化以通明神理万品贊陰陽光功德治之大本所
宜詳之可令太常卿劉芳亦與主之永平二年秋尚書
令高肇尚書僕射清河王懌等奏言案太樂令公孫崇
所造八音之器并五度五量太常卿劉芳及朝之儒學
執諸經傳考辨合否尺寸度數悉與周禮不同問其所

以稱必依經文聲則不協以情增減殊無準據竊惟樂者皇朝治定之盛事光贊祖宗之茂功垂之後王不刊之制宜憲章先聖詳依經史且二漢魏晉歷諸儒哲未聞器度依經而聲調差謬臣等參議請使臣芳準依周禮更造樂器事訖之後集議並呈從其善者詔可芳上尚書言詞樂諧音本非所曉且國之大事亦不可決於數人今請更集朝彥衆辨是非明取典據資決元凱然後營制肇及尚書邢巒等奏許詔可於是芳主修營時揚州民張陽子義陽民兒鳳鳴陳孝孫戴當千吳殿陳文顯陳成等七人頗解雅樂正聲八佾文武二舞鐘聲管絃登歌聲調芳皆請令教習參取是非

永平三年冬芳上言觀古帝王罔不據功象德而制舞名及諸樂章今欲教文武二舞施之郊廟請參制二舞之名竊觀漢魏已來鼓吹之曲亦不相緣今亦須制新曲以揚皇家之德美詔芳與侍中崔光郭祚黃門游肇孫惠蔚等四人參定舞名并鼓吹諸曲其年冬芳又上言臣聞樂者感物移風諷氓變俗先王所以教化黎元湯武所以原闕一葉

請依京房立準以調八音神龜二年夏有司問狀仲儒言前被符問京房準定六十之律後雖有存曉之者尠

至熹平末張光等猶不能定絃之急緩聲之清濁仲儒授自何師出何典籍而云能曉但仲儒在江左之日頗授琴文嘗覽司馬彪所撰續漢書見京房準術成數昞然而張光等不能定仲儒不量庸昧竊有意焉遂竭愚思鑽研甚久雖未能測其機妙至於聲韻頗有所得度量衡厝出自黃鍾雖造管察氣經史備有但氣有盈黍有巨細差之毫釐失之千里自非管應時候聲凶則是非之原諒亦難定此則非仲儒淺識所敢聞之至於準者本以代律取其分數調校樂器則宮商易辨若尺寸小長則六十宮商相與微濁若分數加短則六

十徵羽類皆小清語其大本居然微異至於清濁相宣諧會歌管皆得應合雖積黍驗氣取聲之本清濁諧會亦須有方若閑準意則辨五聲清濁之韻若善琴術則知五調調音之體參此二途以均樂器則自然應和不相奪倫如不練此必有乖謬案後漢順帝陽嘉二年冬十月行禮辟雍奏應鐘始復黃鐘作樂器隨月律是爲十二之律必須次第爲宮而商角徵羽以類從之尋調聲之體宮商宜濁徵羽用清若公孫崇止以十二律聲而云還相爲宮清濁悉足非唯未練五調調器之法至於五聲次第自是不足何者黃鍾爲聲氣之元其管最

長故以黃鐘爲宮太簇爲商林鍾爲徵則宮徵相順若均之八音猶須錯採衆聲配成其美若以應鐘爲宮大呂爲商蕤賓爲徵則徵濁而宮清雖有其韻不成音曲若以夷則爲宮則十二律中唯得取中呂爲徵其商角羽並無其韻若以中呂爲宮則十二律內全無所取何者中呂爲十二之竅疑變律之首依京房書中呂爲宮乃以去滅爲商執始爲徵然後方韻而崇乃以中呂猶用林鍾爲商黃鍾爲徵何由可諧仲儒以調和樂器文飾五聲非準不妙若如嚴嵩父子心賞清濁是則爲難若依案見尺作準調絃緩急清濁可以意推耳但音聲

精微史傳簡略舊志唯云準形如瑟十三絃隱間九尺以應黃鍾九寸調中一絃令與黃鍾相得案盡以求其聲遂不辨準須柱以不柱有高下絃有粗細餘十二絃復應若爲致令攬者望風拱手又案房準九尺之內爲一十七萬七千一百四十七分一尺之內爲九千六百八十三分又復十之是爲於準一寸之內亦爲九千六百八十三分然則於準一分之內乘爲二十分又爲小分以辨彊弱中間至促雖復離朱之明猶不能窮而分之雖然仲儒私曾考驗但前却中柱使入準常尺分之內則相生之韻已自應合分數既微器宜精妙其

準面平直須如停水其中絃一柱高下須與二頭臨岳
一等移柱上下之時不使離絃不得舉絃又中絃粗細
須與琴宮相類中絃須施軫如琴以軫調聲令與黃鐘
一管相合中絃下依數盡出六十律清濁之節其餘十
二絃須施柱如箏又凡絃皆須豫張使臨時不動卽於
中絃案盡一周之聲度著十二絃上然後依相生之法
以次運行取十二律之商徵商徵既定又依琴五調調
聲之法以均樂器其瑟調以宮爲主清調以商爲主平
調以宮爲主五調各以一聲爲主然後錯採衆聲以文
飾之方如錦繡上來消息調準之方並史文所略出仲

儒所思若事有乖此聲則不和仲儒尋準之分數精微
如彼定絃緩急艱難若此而張光等親掌其事尚不知
藏中有準旣未識其器又焉能施絃也且燧人不師資
而習火延壽不束脩以變律故云知之者欲教而無從
心達者體知而無師苟有一毫所得皆關心抱豈必要
經師授然後爲奇哉但仲儒自省膚淺才非一足正可
粗識音韻纔言其理致耳時尚書蕭寶夤奏言金石律
呂制度調均中古已來尠或通曉仲儒雖粗述書文頗
有所說而學不師授云出已心又言舊器不任必須更
造然後克諧上達成勅用舊之旨輒持已心輕欲制作

臣竊思量不合依許詔曰禮樂之事蓋非常人所明可如所奏正光中侍中安豐王延明受詔監修金石博探古今樂事令其門生河間信都芳考算之屬天下多難終無制造芳後乃撰延明所集樂說并諸器物準圖二十餘事而注之不得在樂署考正聲律也

普泰中前廢帝詔錄尚書長孫稚太常卿祖瑩管理金石永熙二年春稚瑩表曰臣聞安上治民莫善於禮移風易俗莫善於樂易曰先王以作樂崇德殷薦之上帝以配祖考書曰戛擊鳴球搏拊琴瑟以詠祖考來格詩言志律和聲敦叙九族平章百姓天神於焉降歆地祇

可得而禮故樂以象德舞以象功干戚所以比其形容金石所以發其歌頌薦之宗廟則靈祇饗其和用之朝廷則君臣協其志樂之時義大矣哉雖復汭革異時晦明殊位周因殷禮百世可知也太祖道武皇帝應圖受命光宅四海義合天經符地緯九戎荐舉五禮未詳太宗世祖重耀恭宗顯祖誕隆丕基而猶經營四方匪不作高祖孝文皇帝承太平之緒纂無爲之運帝圖旣遠王度惟新太和中命故中書監高閭草創古樂閭尋去世未就其功閭亡之後故太樂令公孫崇續修遺事十有餘載崇敷奏其功時太常卿劉芳以崇所

作體制差舛不合古義請更修管被旨聽許芳又釐綜久而申呈時故東平王元匡共相論駁各樹朋黨爭競紛綸竟無底定及孝昌已後世屬艱虞內難孔殷外敵滋甚永安之季胡賊入京燔燒樂庫所有之鐘悉畢賊手其餘磬石咸爲灰燼普泰元年臣等奉勅營造樂器責問太樂前來郊丘懸設之方宗廟施安之分太樂令張乾龜荅稱芳所造六格北廂黃鍾之均實是夷則之調其餘三廂宮商不和共用一笛施之前殿樂人尚存又有沽洗太簇二格用之後宮檢其聲韻復是夷則於今尚在而芳一代碩儒斯文攸屬討論之日必應考古

深有明證乾龜之辨恐是歷歲稍遠伶官失職芳久殂沒遺文銷毀無可遵訪臣等謹詳周禮分樂而序之凡樂園鐘爲宮黃鐘爲角太簇爲徵姑洗爲羽若樂六變天神可得而禮函鐘爲宮大簇爲角姑洗爲徵南呂爲羽若樂八變地示可得而禮黃鐘爲宮大呂爲角大簇爲徵應鐘爲羽若樂九變人鬼可得而禮至於布置不得相生之次兩均異宮並無商聲而同用一徵書曰於予擊石拊石百獸率舞八音克諧神人以和計五音不具則聲豈成文七律不備則理無和韻八音克諧莫曉其旨聖道幽玄微言已絕漢魏以來未能作者案春秋

魯昭公二十年晏子言於齊侯曰先王之濟五味和五聲也以平其心成其政也聲亦如味一氣二體三類四物五聲六律七音八風九歌以相成也服子慎注云黃鐘之均黃鐘爲宮太簇爲商姑洗爲角林鐘爲徵南呂爲羽應鐘爲變宮蕤賓爲變徵一懸十九鐘十二懸二百二十八鐘八十四律卽如此義乃可尋究今案周禮小胥之職樂懸之法鄭注云鐘磬編縣之二八十六枚漢成帝時犍爲郡於水濱得古磬十六枚獻呈漢以爲瑞復依禮圖編懸十六去正始中徐州薛成送玉磬十六枚亦是一懸之器檢太樂所用鐘磬各一懸十四不知何據魏侍中謬襲云周禮以六律六同五聲八音六舞大合樂以致鬼神今之樂官徒知古有此制莫有明者又云樂制旣亡漢成謂韶武武德武始大鈞可以備四代之樂奏黃鐘舞文始以祀天地奏太簇舞大武以祀五郊明堂奏姑洗舞武德巡狩以祭四望山川奏蕤賓舞武始大鈞以祀宗廟祀圓丘方澤羣廟禘祭之時則可兼舞四代之樂漢亦有雲翹育命之舞罔識其源漢以祭天魏時又以雲翹兼祀圓丘天郊育命兼祀方澤地郊今二舞久亡無復知者臣等謹依高祖所制尺周官考工記鳧氏爲鐘鼓之分磬氏爲磬倨闕字之法禮

周官考工記鳧氏爲鐘鼓之分磬氏爲磬倨闕字之法禮

運五聲十二律還相爲宮之義以律呂爲之劑量奏請
制度經紀營造依魏晉所用四廂宮懸鍾磬各十六懸
塤箎箏筑聲韻區別蓋理三稔於茲始就五聲有節八
音無爽笙鏞和合不相奪倫元日備設百僚允矚雖未
極萬古之徽蹤實是一時之盛事竊惟古先哲王制禮
作樂各有所稱黃帝有成池之樂顓頊作承雲之舞大
章大韶堯舜之異名大夏大濩禹湯之殊稱周言大武
秦曰壽人及焚書絕學之後舊章淪滅無可準據漢高
祖時叔孫通因秦樂人制宗廟樂迎神廟門奏嘉至皇
帝入廟門奏永至登歌再終下奏休成之樂通所作也

高祖六年有昭容樂禮容樂又有房中祠樂高祖唐山
夫人所作也孝惠二年使樂府令夏侯寬備其簫管更
名安世樂高祖廟奏武德文始五行之舞孝文廟奏昭
德文始四時五行之舞孝武廟奏盛德文始四時五行
之舞武德者高祖四年作也以象天下樂已行武以除
亂也文始舞者舜韶舞高祖六年更名曰文始以示不
相襲也五行舞者本周舞秦始皇二十六年更名曰五
行也四時舞者孝文所作以明天下之安和也孝景以
武德舞爲昭德孝宣以昭德舞爲盛德光武廟奏大武
諸帝廟並奏文始五行四時之舞及卯金不祀當塗勃

與魏武廟樂改云韶武用虞之大韶周之大武總號大
鈞也曹失其鹿典午乘時晉氏之樂更名正德自昔帝
王莫不損益相緣徽號殊別者也而皇魏統天百三十
載至於樂舞迄未立名非所以聿宣皇風章明功德贊
揚懋軌垂範無窮者矣案今后宮饗會及五郊之祭皆
用兩懸之樂詳攬先誥大爲紕繆古禮天子宫懸諸侯
軒懸大夫判懸士特懸皇后禮數德合王者名器所資
豈同於大夫哉孝經言嚴父莫大於配天宗祀文王於
明堂以配上帝卽五精之帝也禮記王制庶羞不踰牲
燕衣不踰祭服論語禹卑宮室盡力於溝洫惡衣服致

美於黻冕何有殿庭之樂過於天地乎失禮之差遠於
千里昔漢孝武帝東巡狩封禪還祀泰一於甘泉祭后
土於汾陰皆盡用明其無減昔泰元年前侍中臣孚及
臣瑩等奏求造十二懸六懸裁訖續復營造尋蒙旨判
今六懸旣成臣等思鍾磬各四鈸罇相從十六格宮懸
已足今請更管二懸通前爲八宮懸兩具矣一具備於
太極一具列於顯陽若圓丘方澤上辛四時五郊社稷
諸祀雖時日相礙用之無闕孔子曰周道四達禮樂交
通傳曰魯有禘樂賓祭用之然則天地宗廟同樂之明
證也其升斗權量當時未定請卽刊校以爲長準周存

六代之樂雲門咸池韶夏濩武用於郊廟各有所施但世運遙緬隨時亡缺漢世唯有虞韶周武魏爲武始咸熙錯綜風聲爲一代之禮晉無改造易名正德今聖朝樂舞未名舞人冠服無準稱之文武舞而已依魏景初三年以來衣服制其祭天地宗廟武舞執干戚著平冕黑介幘玄衣裳白領袖絳領袖中衣絳合幅袴袂黑韋鞮文舞執羽籥冠委貌其服同上其奏於廟庭武舞武弁赤介幘生絳袍單衣練領袖皂領袖中衣虎文畫合幅袴白布袂黑韋鞮文舞者進賢冠黑介幘生黃袍單衣白合幅袴服同上其魏晉相因承用不改古之神室

方各別所故聲歌各異今之太廟連基接棟樂舞同奏於義得通自中煩喪亂晉室播蕩永嘉已後舊章湮沒大武皇帝破平統萬得古雅樂一部正聲歌五十曲工伎相傳間有施用自高祖遷居世宗晏駕內外多事禮物未周今日所有王夏肆夏之屬二十三曲猶得擊奏足以闡累聖之休風宣重光之盛美伏惟陛下仁格上皇義光下武道契玄機業隆寶祚思服典章留心軌物反堯舜之淳風復文武之境土飾宇宙之儀刑納生人於福地道德熙泰樂載新聲天成地平於是乎在樂舞之名乞垂旨判臣等以愚昧參厠問道呈御之日伏增

惶懼詔其樂名付尚書博議以聞其年夏集羣官議之
瑩復議曰夫樂所以乘靈通化舞所以象物昭功金石
播其風聲絲竹申其歌詠郊天祠地之道雖百世而可
知奉神育民之理經千載而不昧是以黃帝作咸池之
樂顓頊有承雲之舞堯爲大章舜則大韶禹爲大夏湯
爲大濩周曰大武秦曰壽人漢爲大予魏名大鈞晉曰
正德雖三統互變五運代降莫不述作相因徽號殊別
者也皇魏道格三才化清四字奕世載德累葉重光或
以文教興邦或以武功平亂功成治定於是乎在及主
上龍飛載造景命惟新書軌自同典刑罔二覆載均於

兩儀仁澤被於四海五聲有序八音克諧樂舞之名宜
以詳定案周兼六代之樂聲律所施咸有次第滅學以
後經禮散亡漢來所存二舞而已請以韶武爲崇德武
舞爲章烈總名曰嘉成漢樂章云高張四縣神來燕饗
宗廟所設宮懸明矣計五郊天神尊於人鬼六宮陰極
體同至尊理無減降宜皆用宮懸其舞人冠服制裁咸
同舊式庶得以光贊鴻功敷揚大業錄尚書事長孫稚
已下六十人同議申奏詔曰王者功成作樂治定制禮
以成爲號良無間然又六代之舞者以大爲名今可準
古爲大成也凡音樂以舞爲主故干戈羽籥禮亦無別

但依舊爲文舞武舞而已餘如議

初侍中崔光臨淮王或並爲郊廟歌詞而迄不施用樂人傳習舊曲加以訛失了無章句後太樂令崔九龍言於太常卿祖瑩曰聲有七聲調有七調以今七調合之七律起於黃鐘終於中呂今古雜曲隨調舉之將五百曲恐諸曲名後致亡失今輒條記存之於樂府瑩依而上之九龍所錄或雅或鄭至於淫俗四夷雜歌但記其聲折而已不能知其本意又名多謬舛莫識所由隨其淫正而取之樂署今見傳習其中復有所遺至於古雅尤多亡矣

初高祖討淮漢世宗定壽春收其聲役江左所傳中原舊曲明君聖主公莫白鳩之屬及江南吳歌荆楚四聲總謂清商至於殿庭饗宴兼奏之其圓丘方澤上辛地祇五郊四時拜廟三元冬至社稷馬射籍田樂人之數各有差等焉

樂志五第十四

魏書一百九

食貨志六第十五

魏書一百一十

夫為國為家者莫不以穀貨為本故洪範八政以食為首其在易曰聚人曰財周禮以九職任萬民以九賦斂財賄是以古先哲王莫不敬授民時務農重穀躬親千畝貢賦九州且一夫不耕一女不織或受其饑寒者饑寒迫身不能保其赤子攘竊而犯法以至於殺身迹其所由王政所陷也夫百畝之內勿奪其時易其田疇薄其稅斂民可使富也既飽且富而仁義禮節生焉亦所謂衣食足識榮辱也晉末天下大亂生民道盡或死於干戈或斃於饑饉其幸而自存者蓋十五焉

太祖定中原接喪亂之敝兵革並起民廢農業方事雖
殷然經略之先以食爲本使東平公儀懇闢河北自五
原至于桐陽塞外爲屯田初登國六年破衛辰收其珍
寶畜產名馬三十餘萬牛羊四百餘萬漸增國用既定
中山分徙吏民及徒何種人工伎巧十萬餘家以充京
都各給耕牛計口授田天興初制定京邑東至代郡西
及善無南極陰館北盡參合爲畿內之田其外四方四
維置八部帥以監之勸課農耕量校收入以爲殿最又
躬耕籍田率先百姓自後比歲大熟匹中八十餘斛是
時戎車不息雖頻有年猶未足以久贍矣

太宗永興中頻有水旱詔簡宮人非所當御及非執作
伎巧自餘出賜鰥民神瑞二年又不熟京畿之內路有
行饑帝以饑將遷都於鄴用博士崔浩計乃止於是分
簡尤貧者就食山東敕有司勸課留農者曰前志有之
人生在勤勤則不匱凡庶民之不畜者祭無牲不耕者
祭無盛不樹者死無槨不蠶者衣無帛不績者喪無衰
教行三農生殖九穀教行園囿毓長草木教行虞衡山
澤作材教行數牧養蕃鳥獸教行百工飭成器用教行
商賈阜通貨賄教行嬪婦化治絲枲教行臣妾事勤力
役自是民皆力勤故歲數豐穰畜牧滋息

泰常六年詔六部民羊滿百口調戎馬一匹

世祖卽位開拓四海以五方之民各有其性故修其教不改其俗齊其政不易其宜納其方貢以充倉廩收其貨物以實庫藏又於歲時取鳥獸之登於俎用者以物膳府

先是禁網疏闊民多逃隱天興中詔採諸漏戶令輸綸綿自後諸逃戶占爲細繭羅穀者甚衆於是雜營戶帥徧於天下不隸守宰賦役不周戶口錯亂始光三年詔一切罷之以屬郡縣

神麇二年帝親御六軍略地廣漠分命諸將窮追蠕蠕

東至瀚海西接張掖北度燕然山大破之虜其種落及馬牛雜畜方物萬計其後復遣成周公萬度歸西伐焉考其王鳩尸卑那單騎奔龜茲舉國臣民負錢懷貨一時降款獲其奇寶異玩以巨萬駝馬雜畜不可勝數度歸遂入龜茲復獲其殊方瓌詭之物億萬已上是時方隅未尅帝屢親戎駕而委政於恭宗真君中恭宗下令脩農職之教事在帝紀此後數年之中軍國用足矣高宗時牧守之官頗爲貨利太安初遣使者二十餘輩循行天下觀風俗視民所疾苦詔使者察諸州郡墾殖田畝飲食衣服閭里虛實盜賊劫掠貧富彊劣而罰之

自此牧守頗改前弊民以安業

自太祖定中原世祖平方難收獲珍寶府藏盈積和平
二年秋詔中尚方作黃金合盤十二具徑二尺二寸鏤
以白金鈿以玫瑰其銘曰九州致貢殊域來賓乃作茲
器錯用貝珍鍛以紫金鏤以白銀範圍擬載吐燿含真
織文麗質若化若神皇王御之百福惟新其年冬詔出
內庫綾綿布帛二十萬匹令內外百官分曹賭射四年
春詔賜京師之民年七十已上太官厨食以終其身顯
祖卽位親行儉素率先公卿思所以賑益黎庶至天安
皇興間歲頻大旱絹匹千錢劉或淮北青冀徐兗司五

州告亂請降命將率衆以援之旣臨其境青冀懷貳進
軍圍之數年乃拔山東之民咸勤於征戍轉運帝深以
爲念遂因民貧富爲租輸三等九品之制千里內納粟
千里外納米上三品戶入京師中三品入他州要倉下
三品入本州

先是大安中高宗以常賦之外雜調十五頗爲煩重將
與除之尚書毛法仁曰此是軍國資用今頓罷之臣愚
以爲不可帝曰使地利無窮民力不竭百姓有餘吾孰
與不足遂免之未幾復調如前至是乃終罷焉於是賦
斂稍輕民復贍矣

舊制民間所織絹布皆幅廣二尺二寸長四十尺爲一匹六十尺爲一端令任服用後乃漸至濫惡不依尺度高祖延興三年秋七月更立嚴制令一準前式違者罪各有差有司不檢察與同罪

太和八年始準古班百官之祿以品第各有差先是天下戶以九品混通戶調帛二匹絮二斤絲一斤粟二十石又入帛一匹二丈委之州庫以供調外之費至是戶增帛三匹粟二石九斗以爲官司之祿後增調外帛滿二匹所調各隨其所出其司冀雍華定相秦洛豫懷兗陝徐青齊濟南豫東兗東徐十九州貢綿絹及絲幽

平并肆歧涇荆涼梁汾秦安營幽夏光郢東秦司州萬年鴈門上谷靈丘廣寧平涼郡懷州邵郡上郡之長平白水縣青州北海郡之膠東縣平昌郡之東武平昌縣高密郡之昌安高密夷安黔陬縣秦州河東之蒲坂汾陰縣東徐州東莞郡之莒諸東莞縣雍州馮翊郡之連芍縣咸陽郡之寧夷縣北地郡之三原雲陽銅官宜君縣華州華山郡之夏陽縣徐州北濟郡之離狐豐縣東海郡之贛榆襄賁縣皆以麻布充稅九年下詔均給天下民田諸男夫十五以上受露田四十畝婦人二十畝奴婢依良丁牛一頭受田三十畝限四牛所授之田率

倍之三易之田再倍之以供耕作及還受之盈縮諸民
年及課則受田老免及身沒則還田奴婢牛隨有無以
還受諸桑田不在還受之限但通入倍田分於分雖盈
沒則還田不得以充露田之數不足者以露田充倍諸
初受田者男夫一人給田二十畝課蔣餘種桑五十樹
棗五株榆三根非桑之土夫給一畝依法課蔣榆棗奴
各依良限三年種畢不畢奪其不畢之地於桑榆地分
雜蔣餘果及多種桑榆者不禁諸應還之田不得種桑
榆棗果種者以違令論地入還分諸桑田皆爲世業身
終不還恒從見口有盈者無受無還不足者受種如法

盈者得賣其盈不足者得買所不足不得賣其分亦不
得買過所足諸麻布之士男夫及課別給麻田十畝婦
人五畝奴婢依良皆從還受之法諸有舉戶老小癯殘
無受田者年十一已上及癯者各授以半夫田年踰七
十者不還所受寡婦守志者雖免課亦授婦田諸還受
民田恒以正月若始受田而身亡及賣買奴婢牛者皆
至明年正月乃得還受諸土廣民稀之處隨力所及官
借民種蔣役有土居者依法封授諸地狹之處有進丁
受田而不樂遷者則以其家桑田爲正田分又不足不
給倍田又不足家內人別減分無桑之鄉準此爲法樂

遷者聽逐空荒不限異州他郡唯不聽避勞就逸其地足之處不得無故而移諸民有新居者三口給地一畝以爲居室奴婢五口給一畝男女十五以上因其地分口課種菜五分畝之一諸一人之分正從正倍從倍不得隔越他畔進丁受田者恒從所近若同時俱受先貧後富再倍之田放此爲法諸遠流配謫無子孫及戶絕者墟宅桑榆盡爲公田以供授受授受之次給其所親未給之間亦借其所親諸宰民之官各隨地給公田刺史十五頃太守十頃治中別駕各八頃縣令郡丞六頃更代相付賣者坐如律

魏初不立三長故民多陰附陰附者皆無官役豪彊徵斂倍於公賦十年給事中李冲上言宜準古五家立二隣長五隣立一里長五里立一黨長長取鄉人彊謹者隣長復一夫里長二黨長三所復復征戍餘若民三載亡愆則陟用陟之一等其民調夫一婦帛一匹粟二石民年十五以上未娶者四人出一夫一婦之調奴任耕婢任績者八口當未娶者四耕牛二十頭當奴婢八其麻布之鄉一夫一婦布一匹下至牛以此爲降大率十匹爲工調二匹爲調外費三匹爲內外百官俸此外雜調民年八十已上聽一子不從役孤獨癯老篤疾貧窮

不能自存者三長內送養食之書奏諸官通議稱善者
衆高祖從之於是遣使者行其事乃詔曰夫任土錯貢
所以通有無并乘定賦所以均勞逸有無通則民財不
匱勞逸均則人樂其業此自古之常道也又隣里鄉黨
之制所由來久欲使風教易周家至日見以大督小從
近及遠如身之使手幹之總條然後口筭平均義興訟
息是以三典所同隨世沍隆貳監之行從時損益故鄭
僑復丘賦之術鄒人獻盍徹之規雖輕重不同而當時
俱適自昔以來諸州戶口籍貫不實包藏隱漏廢公罔
私富彊者并兼有餘貧弱者餬口不足賦稅齊等無輕

重之殊力役同科無衆寡之別雖建九品之格而豐墮
之士未融雖立均輸之楷而蠶績之鄉無異致使淳化
未樹民情偷薄朕每思之良懷深慨今革舊從新爲里
黨之法在所牧守宜以喻民使知去煩卽簡之要初百
姓咸以爲不若循常豪富并兼者尤弗願也事施行後
計省昔十有餘倍於是海內安之十一年大旱京都民
饑加以牛疫公私闕乏時有以馬驢及橐駝供駕輓耕
載詔聽民就豐行者十五六道路給糧粟至所在三長
贍養之遣使者時省察焉留業者皆令主司審覈開倉
賑貸其有特不自存者悉檢集爲粥於術衢以救其困

然主者不明牧察郊甸閒甚多餒死者時承平日久府藏盈積詔盡出御府衣服珍寶太官雜器太僕乘具內庫弓矢刀鉞十分之八外府衣物繒布絲纈諸所供國用者以其大半班齎百司下至工商卑隸逮于六鎮邊戍畿內鰥寡孤獨貧癯者皆有差十二年詔羣臣求安民之術有司上言請析州郡常調九分之二京都度支歲用之餘各立官司豐年糴貯於倉時儉則加私之一糴之於民如此民必力田以買絹積財以取粟官年登則常積歲凶則直給又別立農官取州郡戶十分之一以爲屯民相水陸之宜斷頃畝之數以贖贖雜物市牛科給令其肆力一夫之田歲責六十斛甄其正課并征戍雜役行此二事數年之中則穀積而民足矣帝覽而善之尋施行焉自此公私豐贍雖時有水旱不爲災也世祖之平統萬定秦隴以河西水草善乃以爲牧地畜產滋息馬至二百餘萬匹橐駝將半之牛羊則無數高祖卽位之後復以河陽爲牧場拓置戎馬十萬匹以擬京師軍警之備每歲自河西徙牧於并州以漸南轉欲其習水土而無死傷也而河西之牧彌滋矣正光以後天下喪亂遂爲羣寇所盜掠焉

世宗延昌三年春有司奏長安驪山有銀鑛二石得銀

七兩其年秋恒州又上言白登山有銀鑛八石得銀七兩錫三百餘斤其色潔白有踰上品詔並置銀官常令採鑄又漢中舊有金戶千餘家常於漢水沙淘金年終總輸後臨淮王或爲梁州刺史奏罷之其鑄鐵爲農器兵刃在所有之然以相州牽口冶爲工故常鍊鍛爲刀送於武庫

自魏德旣廣西域東夷貢其珍物充於王府又於南垂立互市以致南貨羽毛齒革之屬無遠不至神龜正光之際府藏盈溢靈太后曾令公卿已下任力負物而取之又數資禁內左右所費無貲而不能一丐百姓也自

徐楊內附之後仍世經略江淮於是轉運中州以實邊鎮百姓疲於道路乃令番戍之兵營起屯田又收內郡兵資與民和糴積爲邊備有司又請於水運之次隨便置倉乃於小平右門白馬津漳涯黑水濟州陳郡大梁凡八 各立邸閣每軍國有須應機漕引自此費役徵省三門都將薛欽上言計京西水次汾華二州恒農河北河東正平平陽五郡年常綿絹及貲麻皆折公物雇車牛送京道險人敝費公損私略計華州一車官酬絹八匹三丈九尺別有私民雇價布六十匹河東一車官酬絹五匹二丈別有私民雇價布五十四匹自餘州郡雖

未練多少推之遠近應不減此今求車取雇絹三匹市
材造舡不勞採斫計舡一艘舉十二車車取三匹合有
三十九匹雇作手并匠及舡上雜具食直足以成舡計
一舡剩絹七十八匹布七百八十四匹又租車一乘官格
四十斛成載私民雇價遠者五斗布一匹近者一石布
一匹準其私費一車布遠者八十四匹近者四十四匹造舡
一艘計舉七百石準其雇價應有一千四百匹今取布
三百匹造舡一艘并舡上覆治雜事計一舡有剩布一
千一百匹又其造舡之處皆須鋸材人功并削舡茹依
功多少卽給當州郡門兵不假更召汾州有租調之處

去汾不過百里華州去河不滿六十並令計程依舊酬
價車送舡所舡之所運唯達雷陂其陸路從雷陂至倉
庫調一車雇絹一匹租一車布五匹則於公私爲便尚
書度支郎中朱元旭計稱效立於公濟民爲本政列於
朝潤國是先故大禹踈決以通四載之宜有漢穿引受
納百川之用厥績顯於當時嘉聲播於圖史今校薛欽
之說雖跡驗未彰而指況甚善所云以舡代車是其策
之長者若以門兵造舟便爲闕彼防禦無容全依宜令
收雇車之物市材執作及倉庫所須悉以營辦七月之
始十月初旬令州郡綱典各租調於將所然後付之十

車之中留車士四人佐其守護粟帛上船之日隨運至京將共監慎如有耗損其倍徵河中缺失專歸運司輸京之時聽其卽納不得雜合違失常體必使量上數下謹其受入自餘一如其列計底柱之難號爲天險迅驚千里未易其功然旣陳便利無容輒抑若效充其說則附例酬庸如其不驗徵填所損今始開荆不可懸生減折且依請營立一年之後須知贏費歲遣御史校其虛實脫有乖越別更裁量尚書崔休以爲剗木爲舟用輿上代鑿渠通運利盡中古是以漕輓河渭留俟以爲偉談方舟蜀漢酈生稱爲口實豈直張純之奏見美東都陳

勰之功事高晉世其爲利益所從來久矣案欽所列實允事宜郎中之計備盡公理但舟楫所通遠近必至苟利公私不宜止在前件昔人乃遠通襄斜以利關中之漕南達交廣以增京洛之饒況乃漳洹夷路河濟平流而不均彼省煩同茲巨益且鴻溝之引宋衛史牒具存討虜之通幽冀古迹備在舟車省益理寔相懸水陸難易力用不等昔忝東州親逕闕字驗斯損益不可同年而語請諸通水運之處皆宜率同此式縱復五百三百里車運水次校計利饒猶爲不少其欽所列州郡如請興造東路諸州皆先通水運今年租調悉用舟楫若船數

有闕且負假文事比之儻車交成息耗其先未通流宜遣檢行閑月脩治使理有可通必無壅滯如此則發召匪多爲益實廣一爾覽勞久安永逸錄尚書高陽王雍尚書僕射李崇等奏曰運漕之利今古攸同舟車息耗實相殊絕欽之所列關西而已若域內同行足爲公私巨益謹輒參量備如前計庶徵召有減勞止小康若此請蒙遂必須溝洫通流卽求開興修築或先以開治或古跡仍在舊事可因用功差易此冬閑月令踈通咸訖比春水之時使運漕無滯詔從之而未能盡行也

正光後四方多事加以水旱國用不足預折天下六年

租調而徵之百姓怨苦民不堪命有司奏斷百官常給之酒計一歲所省合米五萬二千五十四斛九升孽穀六千九百六十斛麩三十萬五百九十九斤其四時郊廟百神羣祀依式供營遠蕃使客不在斷限尠後寇賊轉衆諸將出征相繼奔敗所亡器械資糧不可勝數而關西喪失尤甚帑藏益以空竭有司又奏內外百官及諸蕃客稟食及肉悉二分減一計終歲省肉百五十九萬九千八百五十六斤米五萬三千九百三十二石孝昌二年終稅京師田租畝五升借賃公田者畝一斗又稅市入者人一錢其店舍又爲五等收稅有差

莊帝初承喪亂之後倉廩虛罄遂班入粟之制輸粟八千石賞散侯六千石散伯四千石散子三千石散男職人輸七百石賞一大階授以實官白民輸五百石聽依第出身一千石加一大階無第者輸五百石聽正九品出身一千石加一大階諸沙門有輸粟四千石入京倉者授本州統若無本州者授大州都若不入京倉入外州郡倉者三千石畿郡都統依州格若輸五百石入京倉者授本郡維那其無本郡者授以外郡粟入外州郡倉者七百石者京倉三百石者授縣維那

孝靜天平初以遷民草荆資產未立詔出粟一百二十

萬石以賑之三年夏又賑遷民粟各四十日其年秋并肆汾建晉秦陝東雍南汾九州霜旱民饑流散四年春詔所在開倉賑恤之而死者甚衆時諸州調絹不依舊式齊獻武王以其害民興和三年冬請班海內悉以四十尺爲度天下利焉

河東郡有鹽池舊立官司以收稅利是時罷之而民有富彊者專擅其用貧弱者不得資益延興末復立監司量其貴賤節其賦入於是公私兼利世宗卽位政存寬簡復罷其禁與百姓共之其國用所須別爲條制取足而已自後豪貴之家復乘勢占奪近池之民又輒障吝

疆弱相陵聞於遠近神龜初太師高陽王雍太傅清河王懌等奏鹽池天藏資育羣生仰惟先朝限者亦不苟與細民競茲贏利但利起天池取用無法或豪貴封護或近者吝守卑賤遠來超然絕望是以因置主司令其裁察疆弱相兼務令得所且十一之稅自古及今取輒以次所濟爲廣自余霑洽遠近齊平公私兩宜儲益不少及鼓吹主簿王後興等詞稱請供百官食鹽二萬斛之外歲求輸馬千匹牛五百頭以此而推非可稍計後中尉甄琛啓求罷禁被敕付議尚書執奏稱琛啓坐談則理高行之則事闕請依常禁爲允詔依琛計乃爲繞池之民尉保光等擅自固護語其隋禁倍於官司取與自由貴賤任口若無大宥罪合推斷詳度二三深乖王法臣等商量請依先朝之詔禁之爲便防姦息暴斷遣輕重亦準前旨所置監司一同往式於是復置直監官以監檢焉其後更罷更立以至於永熙自遷鄴後於滄瀛幽青四州之境傍海煮鹽滄州置竈一千四百八十四瀛州置竈四百五十二幽州置竈一百八十青州置竈五百四十六又於邯鄲置竈四計終歲合收鹽二十萬九千七百二斛四升軍國所資得以周贍矣

魏初至於太和錢貨無所周流高祖始詔天下用錢焉

十九年冶鑄麤備文曰太和五銖詔京師及諸州鎮皆通行之內外百官祿皆準絹給錢絹匹爲錢二百在所遣錢工備爐冶民有欲鑄聽就鑄之銅必精練無所和雜世宗永平三年冬又鑄五銖錢肅宗初京師及諸州鎮或鑄或否或有止用古錢不行新鑄致商貨不通貿遷頗隔熙平初尚書令任城王澄上言臣聞洪範八政貨居二焉易稱天地之大德曰生聖人之大寶曰位何以守位曰仁何以聚人曰財財者帝王所以聚人守位成養羣生奉順天德治國安民之本也夏殷之政九州貢金以定五品周仍其舊太公立九府之法於是國貨

始行定銖兩之楷齊相循用以霸諸侯降及秦始漢文遂有輕重之異吳淠鄧通之錢收利遍於天下河南之地猶甚多焉逮于孝武乃更造五銖其中毀鑄隨利改易故使錢有大小之品竊尋太和之錢高祖留心剗制後與五銖並行此乃不刊之式但臣竊聞之君子行禮不求變俗因其所宜順而致用太和五銖雖利於京邑之肆而不入徐揚之市土貨旣殊貿鬻小異便於荆郢之邦者則礙於交豫之域致使貧民有畝困之切王道貽隔化之訟去永平三年都座奏斷天下用錢不依準式者時被敕云不行之錢雖有常禁其先用之處權可

聽行至年末悉令斷之延昌二年徐州刺史啓奏
求行土錢旨聽權依舊用謹尋不行之錢律中有明式指
謂雞眼銀鑿更無餘禁計河南諸州今所行者悉非制
限昔來繩禁愚竊惑焉又河北州鎮既無新造五銖設
有舊者而復禁斷並不得行專以單絲之縑疎縷之布
狹幅促度不中常式裂匹爲尺以濟有無至今徒成杼
軸之勞不免饑寒之苦良由分截布帛壅塞錢貨實非
救恤凍餒子育黎元謹惟自古以來錢品不一前後累
代易變無常且錢之爲名欲泉流不已愚意謂今之太
和與新鑄五銖及諸古錢方俗所使用者雖有大小之
異並得通行貴賤之差自依鄉價庶貨環海內公私無
壅其不行之錢及盜鑄毀大爲小巧僞不如法者據律
罪之詔曰錢行已久今東尚有事且依舊用澄又奏臣
猥屬樞衡庶罄心力常願貨物均通書軌一範謹詳周
禮外府掌邦布之入出布猶泉也其藏曰泉其流曰布
然則錢之興也始於一品欲令世匠均同圜流無極爰
暨周景降逮亡新易鑄相尋參差百品遂令接境乖商
連邦隔質臣比奏求宣下海內依式行錢登被旨敕錢
行已久且可依舊謹重參量以爲太和五銖乃大魏之
通貨不朽之相模寧可專貿於京邑不行於天下但今

戎馬在郊江疆未一東南之州依舊爲便至於京西京北域內州鎮未用錢處行之則不足爲難塞之則有乖通典何者布帛不可尺寸而裂五穀則有負擔之難錢之爲用貫緡相屬不假斗斛之器不勞秤尺之平濟世之宜謂爲深允請並下諸方州鎮其太和及新鑄五銖并古錢內外全好者不限大小悉聽行之雜眼鑿鑿依律而禁河南州鎮先用錢者旣聽依舊不在斷限唯太和五銖二錢得用公造新者其餘雜種一用古錢生新之類普同禁約諸方之錢通用京師其聽依舊之處與太和錢及新造五銖並行若盜鑄者罪重常憲旣欲均

齊物品廩井斯和若不繩以嚴法無以肅茲違犯符旨一宣仍不遵用者刺史守令依律治罪詔從之而河北諸州舊少錢貨猶以他物交易錢略不入市也二年冬尚書崔亮奏恒農郡銅青谷有銅鑛計一斗得銅五兩四銖葦池谷鑛計一斗得銅五兩鸞帳山鑛計一斗得銅四兩河內郡王屋山鑛計一斗得銅八兩南青州苑燭山齊州商山並是往昔銅官舊迹見在謹按鑄錢方興用銅處廣旣有冶利並宜開鑄詔從之自後所行之錢民多私鑄稍就小薄價用彌賤建義初重盜鑄之禁開糾賞之格至永安二年秋詔更改鑄文曰永安五銖官

自立鑪起自九月至三年正月而止官欲貴錢乃出藏
絹分遣使人於二市賞之絹匹止錢二百而私市者猶
三百利之所在盜鑄彌衆巧僞既多輕重非一四方州
鎮用各不同遷鄴之後輕濫尤多武定初齊文襄王奏
革其弊於是詔遣使人詣諸州鎮收銅及錢悉更改鑄
其文仍舊然姦僥之徒越法趣利未幾之間漸復細薄
六年文襄王以錢文五銖名須稱實宜稱錢一文重五
銖者聽入市用計百錢重一斤四兩二十銖自餘皆準
此爲數其京邑二市天下州鎮郡縣之市各置二稱懸
於市門私民所用之稱皆準市稱以定輕重凡有私鑄
悉不禁斷但重五銖然後聽用若入市之錢重不五銖
或雖重五銖而多雜鉛鐵並不聽用若有輒以小薄雜
錢入市有人糾獲其錢悉入告者其小薄之錢若卽禁
斷恐人交乏絕畿內五十日外州百日爲限羣官叅議
咸以時穀頗貴請待有年上從之而止

食貨志六第十五

魏書一百一十

刑罰志七第十六

魏書一百一十一

二儀既判彙品生焉五才兼用廢一不可金木水火土
咸相愛惡陰陽所育稟氣呈形鼓之以雷霆潤之以雲
雨春夏以生長之秋冬以殺藏之斯則德刑之設著自
神道聖人處天地之間率神祇之意生民有喜怒之性
哀樂之心應感而動動而逾變淳化所陶下以惇朴故
異章服畫衣冠示恥申禁而不敢犯其流既銳姦黠萌
生是以明法令立刑賞故書曰象以典刑流宥五刑鞭
作官刑扑作教刑金作贖刑怙終賊刑責災肆赦殛命
咎繇曰五刑有服五服三就五流有宅五宅三居夏刑

則大辟二百臙辟三百官辟五百劓墨各千殷因於夏
蓋有損益周禮建三典刑邦國以五聽求民情八議以
申之三刺以審之左嘉石平罷民右肺石達窮民宥不
識宥過失宥遺忘赦幼弱赦耄耆赦憊愚周道既衰穆
王荒耄命呂侯度作祥刑以詰四方五刑之屬增矣夫
疑獄汜問與衆共之衆疑赦之必察小大之比以成之
先王之愛民如此刑成而不可變故君子盡心焉逮於
戰國競任威刑以相吞噬商君以法經六篇入說於秦
議參夷之誅連相坐之法風俗凋薄號爲虎狼及於始
皇遂兼天下毀先王之典制挾書之禁法繁於秋荼網
密於凝脂姦偽並生赭衣塞路獄犴淹積圜圍成市於
是天下怨叛十室而九漢祖入關蠲削煩苛致三章之
約文帝以仁厚斷獄四百幾致刑措孝武世以姦宄滋
甚增律五十餘篇宣帝時路溫舒上書曰夫獄者天下
之命書曰與其殺不辜寧失有罪今治獄吏非不慈仁
也上下相毆以刻爲明深者獲公名平者多後患故治
獄吏皆欲人死非憎人也自安之道在人之死夫人情
安則樂生痛則思死捶楚之下何求而不得故囚人不
勝痛則飾辭以示人吏治者利其然則指導以明之上
奏畏卻則鍛鍊而周内之雖咎繇聽之猶以爲死有餘

罪何則文致之罪故也故天下之患莫深於獄宣帝善之痛乎獄吏之害也久矣故曰古之立獄所以求生今之立獄所以求殺人不可不慎也于定國爲廷尉集諸法律凡九百六十卷大辟四百九十條千八百八十二事死罪決比凡三千四百七十二條諸斷罪當用者合二萬六千二百七十二條後漢二百年間律章無大增減魏武帝造甲子科條犯鈇左右趾者易以斗械明帝改士民罰金之坐除婦人加笞之制晉武帝以魏制峻密又詔車騎賈充集諸儒學刪定名例爲二十卷并合二千九百餘條晉室喪亂中原蕩然魏氏承百王之末屬崩散之後典刑泯棄禮俗澆薄自太祖撥亂蕩滌華夏至于太和然後吏清政平斷獄省簡所謂百年而後勝殘去殺故權舉行事以著于篇

魏初禮俗純朴刑禁踈簡宣帝南遷復置四部大人坐王庭決辭訟以言語約束刻契記事無囹圄考訊之法諸犯罪者皆臨時決遣神元因循亡所革易

穆帝時劉聰石勒傾覆晉室帝將平其亂乃峻刑法每以軍令從事民乘寬政多以違命得罪死者以萬計於是國落騷駭平文承業綏集離散

昭成建國二年當死者聽其家獻金馬以贖犯大逆者

親族男女無少長皆斬男女不以禮交皆死民相殺者聽與死家馬牛四十九頭及送葬器物以平之無繫訊連逮之坐盜官物一備五私則備十法令明白百姓晏然

太祖幼遭艱難備嘗險阻具知民之情僞及在位躬行仁厚協和民庶既定中原患前代刑網峻密乃命三公郎王德除其法之酷切於民者約定科令大崇簡易是時天下民久苦兵亂畏法樂安帝知其若此乃鎮之以玄默罰必從輕兆庶欣戴焉然於大臣持法不捨季年災異屢見太祖不豫綱紀褻頓刑罰頗爲濫酷

太宗卽位脩廢官恤民隱命南平公長孫嵩北新侯安同對理民訟庶政復有敘焉帝旣練精庶事爲吏者浸以深文避罪

世祖卽位以刑禁重神麈中詔司徒崔浩定律令除五歲四歲刑增一年刑分大辟爲二科死斬死入絞大逆不道腰斬誅其同籍年十四已下腐刑女子沒縣官害其親者輟之爲蠱毒者男女皆斬而焚其家巫蠱者負殺羊抱犬沈諸淵當刑者贖貧則加鞭二百畿內民富者燒炭於山貧者役於園溷女子入春崇其固疾不逮于人守苑囿王官階九品得以官爵除刑婦人當刑而

孕產後百日乃決年十四已下降刑之半八十及九歲
非殺人而坐拷訊不踰四十九論刑者部主具狀公車
鞫辭而三都決之當死者部案奏聞以死不可復生懼
監官不能平獄成皆呈帝親臨問無異辭怨言乃絕之
諸州國之大辟皆先讞報乃施行闕左懸登聞鼓人有
窮寃則撾鼓公車上奏其表是後民官瀆貨帝思有以
肅之太延三年詔天下吏民得舉告牧守之不法於是
凡庶之凶悖者專求牧宰之失迫脅在位取豪於閭閻
而長吏咸降心以待之苟免而不恥貪暴猶自若也時
輿駕數親征討及行幸四方真君五年命恭宗總百揆
監國少傅游雅上疏曰殿下親覽百揆經營內外昧旦
而與諮詢國老臣職忝疑承司是獻替漢武時始啓河
右四郡議諸疑罪而謫徙之十數年後邊郡充實並脩
農戍孝宣因之以服北方此近世之事也帝王之於罪
人非怒而誅之欲其徙善而懲惡謫徙之苦其懲亦深
自非大逆正刑皆可從徙雖舉家投遠忻喜赴路力役
終身不敢言苦且遠流分離心或思善如此姦邪可息
邊垂足備恭宗善其言然未之行

六年春以有司斷法不平詔諸疑獄皆付中書依古經
義論決之初盜律賊四匹致大辟民多慢政峻其法

賊三匹皆死正平元年詔曰刑網大密犯者更衆朕甚
愍之其詳案律令務求厥中有一不便於民者增損之於
是游雅與中書侍郎胡方回等改定律制盜律復舊加
故縱通情止舍之法及他罪凡三百九十一條門誅四
大辟一百四十五刑二百二十一條有司雖增損條章
猶未能闡明刑典

高宗初仍遵舊式太安四年始設酒禁是時年穀屢登
士民多因酒致酗訟或議主政帝惡其若此及一切禁
之釀沽飲皆斬之吉凶賓親則開禁有日程置內外
候官伺察諸曹外部州鎮有微服雜亂於府寺間以
求百官疵失其所窮治有司苦加訊惻而多相誣逮輒
劾以不敬諸司官賊二丈皆斬又增律七十九章門房
之誅十有三大辟三十五刑六十二和平末冀州刺史
源賀上言自非大逆手殺人者請原其命謫守邊戍詔
從之

顯祖卽位除口誤開酒禁帝勤於治功百寮內外莫不
震肅及傳位高祖猶躬覽萬機刑政嚴明顯拔清節沙
汰貪鄙牧守之廉潔者往往有聞焉

延興四年詔自非大逆干紀者皆止其身罷門房之誅
自獄付中書覆案後頗上下法遂罷之獄有大疑乃平

議焉先是諸曹奏事多有疑請又口傳詔敕或致矯擅於是事無大小皆令據律正名不得疑奏合則制可失衷則彈詰之盡從中墨詔自是事咸精詳下莫敢相罔顯祖末年尤重刑罰言及常用惻愴每於獄案必令覆鞫諸有囚繫或積年不斷羣臣頗以爲言帝曰獄滯雖非治體不猶愈乎倉卒而濫也夫人幽苦則思善故罔罔與福堂同居朕欲其改悔而加以輕恕耳由是囚繫雖淹滯而刑罰多得其所又以赦令屢下則狂愚多僥幸故自延興終於季年不復下赦理官鞫囚杖限五十而有司欲免之則以細捶欲陷之則先大杖民多不勝而誣引或絕命於杖下顯祖知其若此乃爲之制其捶用荆平其節訊囚者其本大三分杖背者二分撻脛者一分拷悉依令皆從於輕簡也

高祖馭宇留心刑法故事斬者皆裸形伏質入死者絞雖有律未之行也太和元年詔曰刑法所以禁暴息姦絕其命不在裸形其參詳舊典務從寬仁司徒元不等奏言聖心垂仁恕之惠使受戮者免裸骸之恥普天感德莫不幸甚臣等謹議大逆及賊各棄市袒斬盜及吏受賕各絞刑踏諸甸師又詔曰民由化穆非嚴刑所制防之雖峻陷者寀甚今犯法至死同入斬刑去衣裸體

男女媾見豈齊之以法示之以禮者也令具爲之制
三年下詔曰治因政寬弊由網密今候職千數姦巧弄
威重罪受賅不列細過吹毛而舉其一切罷之於是更
置謹直者數百人以防諂鬪於街術吏民安其職業先
是以律令不具姦吏用法致有輕重詔中書令高閭集
中祕官等脩改舊文隨例增減又勅羣官參議厥衷經
御刊定

五年冬訖凡八百三十二章門房之誅十有六大辟之
罪二百三十五刑三百七十七除羣行剽劫首謀門誅
律重者止梟首時法官及州郡縣不能以情折獄乃爲

重枷大幾圍復以繩石懸於囚頸傷內至骨更使壯卒
迭搏之囚率不堪因以誣服吏持此以爲能帝聞而傷
之乃制非大逆有明證而不款辟者不得大枷律枉法
十匹義賊二百匹大辟至八年始班祿制更定義賊一
匹枉法無多少皆死是秋遣使者巡行天下糾守宰之
不法坐贓死者四十餘人食祿者跼蹐賅謁之路殆絕
帝哀矜庶獄至於奏讞率從降恕全命徙邊歲以千計
京師決死獄歲竟不過五六州鎮亦簡
十一年春詔曰三千之罪莫大於不孝而律不遜父母
罪止髡刑於理未衷可更詳改又詔曰前命公卿論定

刑典而門房之誅猶在律策違失周書父子異罪推古
求情意甚無取可更議之刪除繁酷秋八月詔曰律文
刑限三年便入極默音密坐無大半之校罪有死生之殊
可詳案律條諸有此類更一刊定冬十月復詔公卿令
參議之

十二年詔犯死罪若父母祖父母年老更無成人子孫
又無暮親者仰案後列奏以待報著之令格

世宗即位意在寬政正始元年冬詔曰議獄定律有國
攸慎輕重損益世或不同先朝垂心典憲刊革令軌但
時屬征役未之詳究施於特用猶致疑舛尚書門下可

於中書外省論律令諸有疑事斟酌新舊更加思理增
減上下必令周備隨有所立別以申聞庶於循變協時
永作通制

永平元年秋七月詔尚書榆枷杖大小違制之由科其
罪失尚書令高肇尚書僕射清河王懌尚書邢巒尚書
李平尚書江陽王繼等奏曰臣等聞王者繼天子物爲
民父母導之以德化齊之以刑法小大必以情哀矜而
勿喜務於三訊五聽不以木石定獄伏惟陛下子愛蒼
生恩侔天地疏網改祝仁過商后以枷杖之非度愍民
命之或傷爰降慈旨廣垂昭恤雖有虞慎獄之深漢文

惻隱之至亦未可共日而言矣謹案獄官令諸察獄先
備五聽之理盡求情之意又驗諸證信事多疑似猶不
首實者然後加以拷掠諸犯年刑已上枷鎖流徒已上
增以杻械迭用不俱非大逆外叛之罪皆不大枷高杻
重械又無用石之文而法官州郡因緣增加遂爲恒法
進乖五聽退違令文誠宜案劾依旨科處但踵行已久
計不推坐檢杖之小大鞭之長短令有定式但枷之輕
重先無成制臣等參量造大枷長一丈三尺喉下長一
丈通頰木各方五寸以擬大逆外叛杻械以掌流刑已
上諸臺寺州郡大枷請悉焚之枷本掌囚非拷訊所用

從今斷獄皆依令盡聽訊之理量人彊弱加之拷掠不
聽非法拷人兼以拷石自是枷杖之制頗有定準未幾
獄官肆虐稍復重大法例律五等列爵及在官品令從
第五以階當刑二歲免官者三載之後聽仕降先階一
等延昌二年春尚書邢巒奏竊詳王公已下或析體宸
極或著勳當時咸胙土授民維城王室至於五等之爵
亦以功錫雖爵秩有異而號擬河山得之至難失之永
墜刑典旣同名復殊絕請議所宜附爲永制詔議律之
制與八坐門下參論皆以爲官人若罪本除名以職當
刑猶有餘資復降階而叙至於五等封爵除刑若盡永

卽甄削便同之除名於例實爽愚謂自王公以下有封
邑罪除名三年之後宜各降本爵一等王及郡公降爲
縣公公爲侯侯爲伯伯爲子子爲男至于縣男則降爲
鄉男五等爵者亦依此而降至於散男其鄉男無可降
授者三年之後聽依其本品之資出身詔從之其年秋
符璽郎中高賢弟貞外散騎侍郎仲賢叔司徒府主簿
六珎等坐弟李賢同元愉逆除名爲民會赦之後被旨
勿論尚書邢巒奏案李賢旣受逆官爲其傳檄規扇幽
瀛邁茲禍亂據律準犯罪當孥戮兄叔坐法法有明典
賴蒙大宥身命獲全除名還民於其爲幸然反逆坐重

故支庶相及體旣相及事同一科豈有赦前皆從流斬
之罪赦後獨除反者之身又緣坐之罪不得以職除流
且貨賕小愆寇盜微戾賊狀露驗者會赦猶除其名何
有罪極裂冠釁均毀冕父子齊刑兄弟共罰赦前同斬
從流赦後有復官之理依律則罪合孥戮準赦則例皆
除名古人議無將之罪者毀其室洿其官絕其蹤滅其
類其宅猶棄而况人乎請依律處除名爲民詔曰死者
旣在赦前又貞外非在正待之限便可悉聽復仕

三年尚書李平奏冀州阜城民費羊皮母亡家貧無以
葬賣七歲子與同城人張回爲婢回轉賣於郟縣民梁

定之而不言良狀案盜律掠人掠賣人和賣人爲奴婢者死回故買羊皮女謀以轉賣依律處絞刑詔曰律稱和賣人者謂兩人詐取他財今羊皮賣女告回稱良張回利賤知良公買誠於律俱乖而兩各非詐此女雖父賣爲婢體本是良回轉賣之日應有遲疑而賣者既以有罪買者不得不坐但賣者以天性難奪支屬易遺尊卑不同故罪有異買者知良故買又於彼無親若買同賣者即理不可何者賣五服內親屬在尊長者死此亦非無從其真買置於致罪刑死大殊明知買者之坐自應一例不得全如鈞議云買者之罪不過賣者之咎也

且買者於彼無天性支屬之義何故得有差等之理又案別條知人掠盜之物而故買者以隨從論依此律文知人掠良從其宜買罪止於流然其親屬相賣坐殊凡掠至於買者亦宜不等若處同流坐於法爲深準律斟降合刑五歲至如買者知是良人決便真賣不語前人得之由緒前人謂真奴婢更或轉賣因此流洞罔知所在家人追贖求訪無處求沈賤隸無復良期案其罪狀與掠無異且法嚴而姦易息政寬而民多犯水火之喻先與明文今謂買人親屬而復決賣不告前人良狀由緒處同掠罪太保高陽王雍議曰州處張回專引盜律

檢回所犯本非和掠保證明然去盜遠矣今引以盜律之條處以和掠之罪原情究律實爲乖當如臣鈞之議知買掠良人者本無罪文何以言之羣盜疆盜無首從皆同和掠之罪故應不異明此自無正條引類以結罪臣鴻以轉賣流漂罪與掠等可謂罪人斯得案賊律云謀殺人而發覺者流從者五歲刑已傷及殺而還蘇者死從者流已殺者斬從而加功者死不加者流詳沈賤之與身死流漂之與腐骨一存一亡爲害孰甚然賊律殺人有首從之科盜人賣買無唱和差等謀殺之與和掠同是良人應爲準例所以不引殺人減之降從疆盜

之一科縱令謀殺之與疆盜俱得爲例而似從輕其義安在又云知人掠盜之物而故買者以隨從論此明禁暴掠之原遏姦盜之本非謂市之於親尊之手而同之於盜掠之刑竊謂五服相賣俱是良人所以容有差等之罪者明去掠盜理遠故從親疏爲差級尊卑爲輕重依律諸共犯罪皆以發意爲首明賣買之元有由魁末之坐宜定若羊皮不云賣則回無買心則羊皮爲元首張回爲從坐首有沾刑之科從有極默之戾推之憲律法刑無據買者之罪宜各從賣者之坐又詳臣鴻之議有從他親屬買得良人而復真賣不語後人由狀者處

同掠罪旣一爲婢賣與不賣俱非良人何必以不賣爲可原轉賣爲難恕張回之愆宜鞭一百賣子葬親孝誠可美而表賞之議未聞刑罰之科已降恐非敦風厲俗以德導民之謂請免羊皮之罪公酬賣直詔曰羊皮賣女葬母孝誠可嘉便可特原張回雖買之於父不應轉賣可刑五歲先是皇族有譴皆不持訊時有宗士元顯富犯罪須鞫宗正約以舊制尚書李平奏以帝宗磐固周布於天下其屬籍踈遠蔭官卑末無良犯憲理須推究請立限斷以爲定式詔曰雲來綿遠繁衍世滋植籍宗氏而爲不善量亦多矣先朝旣無不訊之格而空相

矯恃以長違暴諸在議請之外可悉依常法其年六月兼廷尉卿元志監王靖等上言檢除名之例依律文獄成謂處罪案成者寺謂犯罪逕彈後使覆檢鞫證定刑罪狀彰露案署分晒獄理是成若使案雖成雖已申省事下廷尉或寺以情狀未盡或邀駕搗鼓或門下立疑更付別使者可從未成之條其家人陳訴信其專辭而阻成斷便是曲遂於私有乖公體何者五詐旣窮六備已立僥倖之輩更起異端進求延罪於漏刻退希不測之恩宥辨以惑正曲以亂直長民姦於下隳國法於上竊所未安大理正崔纂評楊機丞甲休律博士劉安元

以爲律文獄已成及決竟經所縮而疑有姦欺不直於法及訴冤枉者得攝訊覆治之檢使處罪者雖已案成御史風彈以痛誣伏或拷不承引依證而科或有私嫌彊逼成罪家人訴枉辭案相背刑憲不輕理須訊鞫旣爲公正豈疑於私如謂規不測之澤抑絕訟端則枉滯之徒終無申理若從其案成便乖覆治之律然未判經赦及覆治理狀真僞未分承前以來如此例皆得復職愚謂經奏遇赦及已覆治得爲獄成尚書李韶奏使雖結案處上廷尉解送至省及家人訴枉尚書納辭連解下鞫未檢遇宥者不得爲案成之獄推之情理謂崔纂等議爲允詔從之

熙平中有冀州妖賊延陵王買負罪逃亡赦書斷限之後不自歸首廷尉卿裴延雋上言法例律諸逃亡赦書斷限之後不自歸首者復罪如初依賊律謀反大逆處置梟首其延陵法權等所謂月光童子劉景暉者妖言惑衆事在赦後亦合死坐正崔纂以爲景暉云能變爲蛇雉此乃傍人之言雖殺暉爲無理恐赦暉復惑衆是以依違不敢專執當今不諱之朝不應行無罪之戮景暉九歲小兒口尚乳臭舉動云爲並不關已月光之稱不出其口皆姦吏無端橫生粉墨所謂爲之者巧殺之

者能若以妖言惑眾據律應死然更不破 惑眾赦令
 之後方顯其律令之外更求其罪赦律何以取信於天
 下天下焉得不疑於赦律乎書曰與殺無辜寧失有罪
 又案法例律八十已上八歲已下殺傷論坐者上請議
 者謂悼耄之罪不用此律愚以老智如尚父少惠如甘
 羅此非常之士可如其議景暉愚小自依凡律靈太后
 令曰景暉既經恩宥何得議加橫罪可謫略陽民餘如
 奏

時司州表河東郡民李憐生行毒藥案以死坐其母訴
 稱一身年老更無甚親例合上請檢籍不謬未及判申

憐母身喪州斷三年服終後乃行決司徒曹參軍許琰
 謂州判為允主簿李瑒駁曰案法例律諸犯死罪若祖
 父母父母年七十已上無成人子孫旁無甚親者具狀
 上請流者鞭笞留養其親終則從流不在原赦之例檢
 上請之言非應府州所決毒殺人者斬妻子流計其所
 犯實重餘憲準之情律所虧不淺且憐既懷酖毒之心
 謂不可參隣人任計其母在猶宜闔門投畀況今死也
 引以三年之禮乎且給假殯葬足示仁寬今已卒哭不
 合更延可依法處斬流其妻子實足誠彼氓庶肅是刑
 章尚書蕭寶寅奏從瑒執詔從之

舊制直閣直後直齋武官隊主隊副等以比視官至於
犯譴不得除罪尚書令任城王澄奏案諸州中正亦非
品令所載又無祿恤先朝已來皆得當刑直閣等禁直
上下有宿衛之勤理不應異靈太后令準中正
神龜中蘭陵公主駙馬卽尉劉輝坐與河陰縣民張智
壽妹容妃陳慶和妹慧猛姦亂耽惑毆主傷胎輝懼罪
逃亡門下處奏各入死刑智壽慶和並以知情不加吐
限處以流坐詔曰容妃慧猛怒死髡鞭付宮餘如奏
書三公郎中崔纂執曰伏見旨募若獲劉輝者職人
二階白民聽出身進一階廝役免役奴婢爲良案輝

叛逆之罪賞同反人劉宣明之格又尋門下處奏以容
妃慧猛與輝私姦兩情耽惑令輝挾忿毆主傷胎雖律
無正條罪合極法並處入死其智壽等二家配敦煌爲
兵天慈廣被不即施行雖恕其命竊謂未可夫律令高
皇帝所以治天下不爲喜怒增減不由親踈改易案關
律祖父母父母忿怒以兵刃殺子孫者五歲刑毆殺者
四歲刑若心有愛憎而故殺者各加一等雖王姬下降
貴殊常妻然人婦之孕不得非一夕生永平四年先朝
舊格諸刑流及死皆首罪判官後決從者事必因本以
求支獄若以輝逃避便應懸處未有捨其首罪而成其

末愆流死參差或時未允門下中禁大臣職在敷奏昔
邴吉爲相不存鬪斃而問牛喘豈不以司別故也案容
妃等罪止於姦私若擒之穢席衆證分明即律科處不
越刑坐何得同宮掖之罪齊奚官之律案智壽口訴妹
適司士曹參軍羅顯貴已生二女於其夫則他家之母
禮云婦人不二夫猶曰不二天若私門失度罪在於夫
曩非兄弟昔魏晉未除五族之刑有免子戮母之坐何
曾諍之謂在室之女從父母之刑已醮之婦從夫家之
刑斯乃不刊之令軌古今之通議律期親相隱之謂比
罪况姦私之醜豈得以同氣相證論刑過其所犯語情

又乖律憲案律姦罪無相緣之文不可借輝之忿加兄
弟之刑夫刑人於市與衆棄之爵人於朝與衆共之明
不私於天下無欺於耳目何得以非正刑書施行四海
刑名一失駟馬不追既有詔旨依即行下非律之案理
宜更請尚書元脩議以爲昔哀姜悖禮於魯齊侯取而
殺之春秋所譏又夏姬罪濫於陳國但責徵舒而不非
父母明婦人外成犯禮之愆無關本屬况出適之妹豐
及兄弟乎右僕射遊肇奏言臣等謬參樞轄獻替是司
門下出納謨明常則至於無良犯法職有司存劾罪結
案本非其事容妃等姦狀罪止於刑並處極法準律未

當出適之女坐及其兄推據典憲理實爲猛又輝雖逃
刑罪非孛戮募同大逆亦謂加重乖律之案理宜陳請
乞付有司重更詳議詔曰輝悖法者之罪不可縱厚賞
懸募必望擒獲容妃慧猛與輝私亂因此耽惑主致非
常此而不誅將何懲肅且已醮之女不應坐及昆弟但
智壽慶和知妹姦情初不防禦招引劉輝共成淫醜敗
風穢化理深其罰特勅門下結獄不拘恒司豈得一同
常例以爲通準且古有詔獄寧復一歸大理而尚書治
本納言所屬弗究悖理之淺深不詳損化之多少違彼
義途苟存執憲殊乖任寄深合罪責崔纂可免郎都坐

尚書悉奪祿一時孝昌已後天下淆亂法令不怕或寬
或猛及介朱擅權輕重肆意在官者多以深酷爲能至
遷鄴京畿群盜頗起有司奏立嚴制諸彊盜殺人者首
從皆斬妻子同籍配爲樂戶其不殺人及賊不滿五匹
魁首斬從者死妻子亦爲樂戶小盜賊滿十匹已上魁
首死妻子配驛從者流侍中孫騰上言謹詳法若畫一
理尚不二不可喜怒由情而致輕重案律公私劫盜罪
止流刑而比執事苦違好爲穿鑿律令之外更立餘條
通相糺之路班捉獲之賞斯乃刑書徒設獄訟更煩法
令滋彰盜賊多有非所謂不嚴而治遵守典故者矣臣

以爲升平之美義在省刑陵遲之弊必由峻法是以漢約三章天下歸德秦酷五刑率土瓦解禮訓君子律禁小人舉罪定名國有常辟至如眚災肆赦怙終賊刑經典垂言國朝成範隨時所用各有司存不宜巨細滋煩令民豫備恐防之彌堅攻之彌甚請諸犯盜之人悉准律令以明恒憲庶使刑殺折衷不得棄本從末詔從之天平後遷移草創百司多不奉法貨賄公行興和初齊文襄王入輔朝政以公平肅物大改其風至武定中法令嚴明四海知治矣

刑罰志七第十六

魏書一百一十一

靈徵志八上第十七

魏書一百一十二

帝王者配德天地協契陰陽發號施令動關幽顯是以克躬脩政畏天敬神雖休勿休而不敢怠也化之所感其徵必至善惡之來報應如響斯蓋神祇眷顧告示禍福人主所以仰瞻俯察戒德慎行弭譴咎致休禎圓首之類咸納於仁壽然則治世之符亂邦之孽隨方而作厥迹不同眇自百王不可得而勝數矣今錄皇始之後災祥小大總爲靈徵志

地震

洪範論曰地陰類大臣之象陰靜而不當動動者臣下

彊盛將動而爲害之應也

太宗泰常四年二月甲子司州地震屋室盡搖動

世祖太延二年十一月丁卯并州地震

四年三月乙未京師地震

十一月丁亥幽兖二州地震

真君元年五月丙午河東地震

高祖延興四年五月鴈門崎城有聲如雷自上西引十

餘聲聲止地震

十月己亥京師地震

太和元年四月辛酉京師地震

五月統萬鎮地震有聲如雷

閏月秦州地震殷殷有聲四年正月雍州氏民齊男王

反

二年二月丙子交州地震四年十月蘭陵民相富反殺

其縣令

七月丁卯并州地震有聲

三年三月戊辰平州地震有聲如雷野雉皆雊

七月丁卯京師地震五年二月沙門法秀謀反

四年五月己酉并州地震

五年二月戊戌秦州地震

六年五月癸未秦州地震有聲

八月甲午秦州地震有聲如雷乙未又震

七年三月甲子秦州地震有聲

四月丁卯肆州地震有聲

六月甲子東雍州地震有聲

八年十一月丙申并州地震

十年正月辛未并州地震殷殷有聲

閏月丙午秦州地震

二月甲子京師地震丙寅又震

丙午秦州地有聲

三月壬子京師及營州地震十二年三月中散梁象保謀反

十九年二月己未光州地震東萊之牟平虞丘山陷五所一處有水

二十年正月辛未并州地震

四月乙未營州地震十二月栢州刺史穆泰等在州謀

反誅

二十二年三月癸未營州地震

八月戊子交州地震

九月辛卯并州地震

二十三年六月乙未京師地震

世宗景明元年六月庚午秦州地震

四年正月辛酉涼州地震

壬申并州地震

六月丁亥秦州地震

十二月辛巳秦州地震正始三年正月秦州民王智等

聚眾二千自號王公尋推秦州主簿呂苟兒爲主

正始元年四月庚辰京師地震

六月乙巳京師地震

二年九月巳丑恒州地震

三年七月巳丑涼州地震殷殷有聲城門崩

八月庚申秦州地震九月夏州長史曹明謀反

永平元年春正月庚寅秦州地震三年二月秦州沙門

劉光秀謀反

九月壬辰青州地震殷殷有聲

二年正月壬寅青州地震

四年五月庚戌恒定二州地震殷殷有聲

十月巳巳恒州地震有聲如雷

延昌元年四月庚辰京師及并朔相冀定瀛六州地震

恒州之繁時桑乾靈丘肆州之秀容鴈門地震陷裂山

崩泉湧殺五千三百一十人傷者二千七百二十一人
牛馬雜畜死傷者三千餘後朱榮彊擅之徵也

十月壬申秦州地震有聲

十一月巳酉定肆二州地震

十二月辛未京師地震東北有聲

二年三月巳未濟州地震有聲

關字 月丙戌京師地震

三年正月辛亥有司奏肆州上言秀容郡敷城縣自延

昌二年四月地震於今不止朱榮徵也四年正月癸

丑華州地震

十一月甲午地震從西北來殷殷有聲丁酉又地震從

東北來

肅宗熙平二年十二月乙巳秦州地震有聲

正光二年六月秦州地震有聲東北引五年莫折念生

反

三年六月庚辰徐州地震孝昌元年元法僧反

考靜武定三年冬并州地震

七年夏并州鄉郡地震

山崩

鴻範論曰山陽君也水陰民也天戒若曰君道崩壞百

姓將失其所也

太祖天賜六年春三月恒山崩

世祖太延四年四月己酉華山崩其占曰山岳配天猶諸侯之係天子山岳崩諸侯有亡者沮渠牧犍將滅之應

世宗景明元年五月乙丑齊州山在縣太陰山崩飛泉湧出殺一百五十九人

四年十一月丁巳恒山崩

正始元年十一月癸亥恒山崩

延昌三年八月辛巳兖州上言泰山崩頽石湧泉十七

處泰山帝王告成封禪之所也而山崩泉湧陽黜而陰盛岱又齊地也天意若曰當有繼齊而興受禪讓者齊代魏之徵也

大風

京房易傳曰衆逆同志至德乃潛厥風

太宗永興三年二月甲午京師大風五月己巳昌黎王慕容伯兒謀反伏誅

十一月丙午又大風五年河西叛胡曹龍張大頭等各領部衆二萬入蒲子

四年正月癸卯元會而大風晦冥乃罷

五年十一月庚寅京師大風起自西方

神瑞元年四月京師大風

二年正月京師大風三月河西饑胡反屯聚上黨推白

亞栗斯為盟主

世祖太延二年四月甲申京師暴風宮牆倒殺數十人

三年十二月京師大風揚沙折樹

真君元年二月京師有黑風竟天廣五丈餘四月庚辰

沮渠無諱寇張掖禿髮保周屯于刪丹嶺

高宗和平二年三月壬午京師大風晦冥

高祖延興五年五月京師赤風

太和二年七月庚申武川鎮大風吹失六家羊角而上
不知所在

壬戌雍州赤風

三年六月壬辰相州大風從西上來發屋折樹

七年四月相豫二州大風

八年三月冀定相三州暴風

四月濟光幽肆雍齊六州暴風

九年六月庚戌濟洛肆相四州及靈丘廣昌鎮暴風折

木

十二年五月壬寅京師連日大風甲辰尤甚發屋拔樹

六月壬申京師大風

十四年七月丁酉朔京師大風拔樹發屋

二十三年八月徐州自甲寅至己未大風拔樹

閏月庚申河州暴風大雨雹

世宗景明元年二月癸巳幽州暴風殺一百六十一人

三年閏月甲午京師大風拔樹發屋吹折閭闔門闕

九月丙辰幽岐梁東秦州暴風昏霧拔樹發屋

四年三月己未司州之河北河東正平平陽大風拔樹

正始元年七月戊辰東秦州暴風拔樹發屋

二年二月癸卯有黑風羊角而上起於柔玄鎮蓋地一

頃所過拔樹甲辰至於營州東入於海

四年五月甲子京師大風

永平元年四月壬申京師大風拔樹八月癸亥冀州刺

史京兆王愉據州反

三年五月己亥南秦州廣業仇池郡大風發屋拔樹

延昌四年三月癸亥京師暴風從西北來發屋折樹

肅宗熙平二年九月瀛州暴風大雨自辛酉至於乙丑

正光三年四月癸酉京師暴風大雨發屋拔樹

四年四月辛巳京師大風

孝昌二年五月丙寅京師暴風拔樹發屋吹平昌門扉

壞永寧九層橙折於時天下所在兵亂

前廢帝普泰元年夏大風雨吹普光寺門屋於地

孝靜武定七年三月潁川大風

大水

鴻範論曰大水者皆君臣治失而陰氣穡積盛彊生水
雨之災也

太祖天賜三年八月霖雨大震山谷水溢

太宗泰常三年八月河內大水

世祖延和元年六月甲戌京師水溢壞民廬舍數百家
真君八年七月平州大水

高祖太和二年夏四月南豫徐兗州大霖雨

六年七月青雍二州大水

八月徐東徐兗濟平豫光七州平原枋頭廣阿臨濟四
鎮大水

九年九月南豫朔二州各大水殺千餘人

二十二年戊午兗豫二州大霖雨

二十三年六月青齊光南青徐豫兗東豫八州大水

世宗景明元年七月青齊南青光徐兗豫東豫司州之

潁川汲郡大水平隰一丈五尺民居全者十四五

正始二年三月青徐州大雨霖海水溢出於青州樂陵

之隰沃縣流漂一百五十二人

永平三年七月州郡二十大水

延昌元年夏京師及四方大水

二年五月壽春大水

肅宗熙平元年六月徐州大水

二年九月冀瀛滄三州大水

正光二年夏定冀瀛相四州大水

孝昌三年秋京師大水

出帝太昌元年六月庚午京師大水穀水汎溢壞三百

餘家

孝靜元象元年定冀瀛滄四州大水

興和四年滄州大水

湧泉

太宗泰常五年十二月壬辰湧泉出于平城

高宗和平五年十一月鴈門泉水穿石湧出

前廢帝普泰元年秋司徒府太倉前井並溢占曰民遷

流之象永熙二年十月都遷於鄴

孝靜天平四年七月泰州井溢

元象元年二月鄴城西南有枯井溢

雨雹

鴻範論曰陽之專氣爲雹陰之專氣爲霰此言陽專而陰脅之陰專而陽薄之不能相入則轉而爲雹猶臣意不合於君心也

高祖延興四年四月庚午涇州大雹傷稼

承明元年四月辛酉青齊徐兗大風雹

八月庚申并州鄉郡大雹平地尺草木禾稼皆盡

癸未定州大雹殺人大者方圓二尺

世定景明元年六月雍青二州大雨雹殺麋鹿

四年五月癸酉汾州大雨雹

六月乙巳汾州大雨雹草木禾稼雉兔皆死

七月甲戌暴風大雨雹起自汾州經并相司兗至徐州而止廣十里所過草木無遺

正始二年三月丁丑齊濟二州大雹雨雪

永平三年五月庚子南秦廣業郡大雨雹殺鳥獸禾稼雪

鴻範論曰春秋之大雨雪猶庶徵之恒雨也然尤甚焉夫雨陰也雪又陰也大雪者陰之稽積盛甚也一曰與大水同冬故爲雪耳

世祖始光二年十月大雪數尺

真君八年五月北鎮寒雪人畜凍死是時爲政嚴急

高祖太和四年九月甲子朔京師大風雨雪三尺

世宗正始元年五月壬戌武川鎮大雨雪

四年二月乙卯司相二州暴風大雨雪

九月壬申大雪

肅宗正光二年四月柔玄鎮大雪

霜

京房易傳曰興兵妄誅茲謂亡法厥災霜夏殺五穀冬殺麥誅不原情茲謂不仁夏先大霜

太祖天賜五年七月冀州霽霜

世祖太延元年七月庚辰大霽霜殺草木

高宗和平六年四月乙丑霽霜

高祖太和三年七月雍朔二州及枹罕吐京薄骨律敦煌仇池鎮並大霜禾豆盡死

六年四月潁川郡霽霜

七年三月肆州風霜殺殺

九年四月雍青二州霽霜

六月洛肆相三州及司州靈丘廣昌鎮霽霜

十四年八月乙未汾州霽霜

世宗景明元年四月丙子夏州霽霜殺草

六月丁亥建興郡霽霜殺草

八月乙亥雍并朔夏汾五州司州之正平平陽頻暴風
實霜

二年三月辛亥齊州實霜殺桑麥

四年三月壬戌雍州實霜殺桑麥

辛巳青州實霜殺桑麥

正始元年五月壬戌武川鎮實霜

六月辛卯懷朔鎮實霜

七月戊辰東秦州實霜

八月庚子河州實霜殺稼

二年四月齊州實霜

五月壬申恒汾二州實霜殺稼

七月辛巳幽岐二州實霜

乙未敦煌實霜

戊戌恒州實霜

三年六月丙申安州實霜

四年三月乙丑幽州頻實霜

四月乙卯敦煌頻實霜

八月河州實霜

永平元年三月乙酉岐幽二州實霜

巳丑并州實霜

四月戊午敦煌實霜

二年四月辛亥武州鎮實霜

延昌四年三月癸亥河南八州實霜

肅宗熙平元年七月河南北十一州霜

無雲而雷

鴻範論曰雷陽也雲陰也有雲然後有雷有臣然後有君也雷託於雲君託於臣陰陽之合也故無雲而雷示君獨處無臣民也

顯祖皇興元年七月東北無雲而雷

二年七月東北有聲如雷

世宗延昌元年二月己酉有聲起東北南引殷殷如雷二聲而止

鼓妖

世祖太延四年十月辛酉北有聲如大鼓西北行

雷

鴻範論曰陽用事百八十三日而終陰用事亦百八十三日而終雷出地百八十三日而入地入地百八十三日而復出地是其常經也故雷安萬物安雷害萬物害猶國也君安國亦安君害國亦害不當雷而雷皆失節也

世祖神麤元年十月巳酉雨雷電

太延三年十月癸丑雷

四年十一月丁亥雷

高祖太和三年十一月庚戌豫州雷雨

戊申豫州大雷雨平地水三寸

四年十月戊戌雷

七年十一月辛巳幽州雷電城內盡赤

世宗景明二年十一月辛卯涼州雷七發聲

三年十二月巳巳夜雷九發聲

正始元年十一月甲寅秦齊荆朔四州雷電

肅宗正光元年正月壬寅雷

震

春秋震夷伯之廟左丘明謂展氏有隱慝焉劉向以為夷伯世大夫天戒若曰勿使大夫世官將專事也

太祖天賜六年四月震天安殿東序帝惡之令左校以衝車攻殿東西兩序屋毀之帝竟暴崩

顯祖皇興二年十一月夜震電

高祖太和三年五月戊午震東廟東中門屋南鴟尾

霧

班固說上不寬大包容臣下則不能居聖位貌言視聽

以心為主四者皆失則區督無識故其咎霧
世祖太延四年正月庚子雨土如霧于洛陽

高祖太和十二年十一月丙戌土霧竟天六日不開到
甲夜仍復濃密勃勃如火煙辛慘人鼻

世宗景明三年二月己丑秦州黃霧雨土覆地

八月己酉濁氣四塞

四年八月辛巳涼州雨土覆地亦如霧

正始二年正月己丑夜陰霧四塞初黑後赤

三年正月辛丑土霧四塞

九月壬申黑霧四塞

延昌元年二月甲戌黃霧蔽塞時高肇以外戚見寵兄
弟受封同漢之五侯也

桃李花

庶徵之恒燠劉向班固以冬亡冰及霜不殺草之應京

房易傳曰夏暑殺人冬則物華實

世祖真君五年八月華林園諸果盡花

高祖延興五年八月中山桃李花

承明元年九月幽州民齊淵家杜樹結實既成一朝盡

落花葉復生七日之中蔚如春狀

世宗景明四年十一月齊州東清河郡桃李華

延昌四年閏十月辛亥京師柰樹華
火不炎上

鴻範論曰棄法律逐功臣殺太子以妾爲妻則火不炎
上謂火失其性而爲災

高宗太安五年春三月肥如城內大火官私廬舍焚燒
略盡唯有東西二寺佛圖像舍火獨不及

高祖太和八年五月戊寅河內沁縣澤自然稍增至百
餘步五日乃滅

世宗景明元年三月乙巳恒岳祠災
肅宗正光元年五月鈞盾禁災

孝昌二年夏幽州道縣地然

三年春瀛州城內大火燒三千餘家

出帝永熙三年二月永寧寺九層佛圖災旣而時人咸
言有人見佛圖飛入東海中永寧佛圖靈像所在天意
若曰永寧見災魏不寧矣渤海齊獻武王之本封也神
靈歸海則齊室將興之驗也

三月并州三級寺南門災

孝靜天平四年秋鄴閭闔門東闕火

武定三年冬汾州西河北山有火潛行地下熱氣上出
黑青黑祥

世祖始光二年正月甲寅夜天東南有黑氣廣一丈長
十丈占有兵二月慕容渴悉隣反於北
顯祖皇興三年正月河濟起黑雲廣數里掩東陽城上
昏暗如夜既而東陽城潰

世宗景明三年九月己卯黑氣四塞甲辰揚州破蕭衍
將張囂之斬級一千

赤眚

高祖太和二年十一月丁未夜有三白氣從地出須臾
變爲黃赤光明照地

十六年九月丁巳昏時赤氣見於西北長二十丈廣八

九尺食頃乃滅

世宗延昌元年三月丙申有赤氣見於天自卯至戌

肅宗正光元年十一月辛未西北赤氣竟天畔似火氣
京師不見涼州以聞

二年九月甲辰夜西北有赤氣似火爛東西一匹餘北
鎮反亂之徵

五年五月癸酉時北有赤氣東西竟天如火爛

莊帝永安二年十一月己丑有赤氣如霧從顯陽殿階
西南角斜屬步廊高一丈許連地如絳紗幔自未至戌
不滅帝見而惡之終有幽崩之禍

孝靜天平三年正月己亥戌時東方有赤氣可三丈餘
三食頃而滅

青青

莊帝永安三年六月甲子申時辰地有青氣廣四尺東
頭緣山西北引至天半止西北戌地有黑赤黃雲如山
峯頭有青氣廣四尺許東南引至天半二氣相接東南
氣前散西北氣後滅亦帝執崩之徵也

夜妖

班固說夜妖者雲風並起而杳冥故與常風同象也溫
而風則生螟騰之孽

世宗正始元年六月乙巳晦

八月甲辰晝晦

人痾

劉歆說貌之不恭是謂不肅上嫚下暴則陰氣勝水傷
百穀衣食不足姦宄並作故其極惡也一曰民多被刑
貌醜惡也班固以爲六畜謂之旤言其著也及人謂之
痾痾病貌言寢深也

太宗永興三年民烏蘭喉下生骨狀如羊角長一尺餘
高祖太和十六年五月尚書李冲奏定州中山郡母極
縣民李班虎女獻容以去年九月二十日右手大拇指

甲下生毛九莖至十月二十日長一尺二寸
肅宗熙平二年十一月己未并州表送祁縣民韓僧真
女令姬從母右脇而生靈太后令付掖庭
正光元年五月戊戌南兗州下蔡郡有大人跡見行七
步跡長一尺八寸廣七寸五分
高祖延興三年秋秀容郡婦人一產四男四產十六男
莊帝永安三年十一月丁卯京師民家妻產男一頭二
身四手四脚三耳

太和十六年十一月乙亥高祖與沙門道登幸侍中省
日入六鼓見一鬼衣黃褶袴當戶欲入帝以爲人叱之

而退問諸左右咸言不見唯帝與道見之

顯祖皇興二年十月豫州疫民死十四萬

世宗永平三年四月平陽之禽昌襄陵二縣大疫自正
月至是月死者二千七百三十人

金沴

大和十九年六月徐州表言丈八銅像汗流於地

永安普泰永熙中京師平等寺定光金像每流汗國有
事變時咸畏異之

永安三年二月京師民家有二銅像各長尺餘一頤下
生白毫四一頤傍生黑毛一

龍蛇之孽

鴻範論曰龍鱗蟲也生於水雲亦水之象陰氣盛故其象至也人君下悖人倫上亂天道必有篡殺之禍

世祖神麿三年三月有白龍二見于京師家人井中
真君六年二月丙辰有白龍見于京師家人井中龍神物也而屈於井中皆世祖暴崩之徵也

蕭宗正光元年八月有黑龍如狗南走至宣陽門躍而上穿門樓下而出魏衰之徵也

莊帝永安二年晉陽龍見于井中久不去莊帝暴崩晉陽之徵也

前廢帝普泰元年四月甲寅有龍跡自宣陽門西出復入城乙卯羣臣入賀帝曰國將興聽於民將亡聽於神但當君臣上下克己為治未足恃此為慶

馬禍

鴻範論曰馬者兵象也將有寇戎之事故馬為怪也

蕭宗熙平二年十一月辛未恒州送馬駒肉尾長一尺驥處不生毛

正光元年九月沃野鎮官馬為蟲入耳死者十四五蟲似蠅長五寸已下大如楮

牛禍

鴻範論易曰坤為牛坤土也土氣亂則牛為怪一曰牛禍其象宗廟將滅一曰轉輸煩則牛生禍

世宗景明二年五月冀州上言長樂郡牛一頭二面二口三目三耳

羊禍

鴻範論曰君不明失政之所致

高祖大和二十三年三月肆州上言陽曲縣羊生羔一頭二身一牝一牡三耳八足尋高祖崩六輔專事

世宗正始元年七月鄯善鎮送羊羔一頭兩身八脚二年正月鄯善鎮送八脚羊

延昌四年五月薄骨律鎮上言羊羔一頭六足兩尾

豕禍

京房傳曰凡妖象其類足多者所任邪也京房易妖曰豕生人頭豕身者邑且亂亡

高祖延興元年九月有司奏豫州刺史臨淮公王讓表有猪生子一頭二身八足

世宗景明四年九月梁州上言犬豕交

正始四年八月京師猪生子一頭四耳兩身八足

延昌四年七月徐州上言陽平戍猪生子頭面似人頂有肉髻體無毛靈太后幼主傾覆之徵也

雞禍

鴻範論曰京房傳曰雞小畜猶小臣也角者兵之象在上君之威也此小臣執事者將秉君之威以生亂不治之害

高祖太和元年夏五月有司奏京師有雌雞二頭上生冠如角與衆雞異是時文明太后臨朝信用羣小之徵世宗正始元年四月河南有雞雛四足四翼語在崔光傳

八月司州上言河內民席衆家雞雛近尾上復有一頭口目具二頭皆從頸後各有二翼二足旁行是時世宗頗任羣小更有朋黨邪佞干政之驗

延昌四年十二月洛州上言魏興太守常矯家黃雌雞頭上肉角大如棗長寸三分角上生聚毛長寸半

肅宗正光元年正月虎賁中郎將蘭堤家雞雄雌二各頭上生兩角其毛雜色上聳過冠時靈太后臨朝專政羽蟲之孽

鴻範論曰視不明聽不聰之罰也

太宗泰常三年十一月京師獲白梟

肅宗正光二年八月己卯獲禿鶯鳥於殿內

孝昌二年四月民有送死鴨雛一頭兩身四足四翅兩

尾

孝靜天平二年三月雄雉飛入尚書省殿中獲之
蝗蟲螟

鴻範論曰刑罰暴虐取利於下貪饕無厭以興師動衆
取邑治城而失衆心則蟲為害矣

高祖太和五年七月敦煌鎮蝗秋稼略盡

六年七月青雍二州蚘蚘害稼

八月徐東徐兗濟平豫光七州平原枋頭廣阿臨濟四
鎮蝗害稼

七年四月相豫二州蝗害稼

八年三月冀州相三州蚘蚘害稼

四月濟光幽肆雍齊平七州蝗

六月乙巳相齊光青四州蚘蚘害稼

十六年十月癸巳枹罕鎮蝗害稼

世宗景明元年五月青齊徐兗光南青六州蚘蚘害稼
四年三月壬午河州大螟二麥無遺

五月光州蚘蚘害稼

六月河州大蝗

七月東萊郡蚘蚘害稼

正始元年六月夏司二州蝗害稼

四年四月青州步屈蟲害棗花

八月涇州黃鼠蝗蟲斑蟲河州蚩蚩班蟲涼州司州恒農郡蝗蟲並為災

永平元年六月巳巳涼州蝗害稼

五年五月青州步屈蟲害棗花

七月蝗蟲京師蚩蚩

八月青齊光三州蚩蚩害稼三分食二

肅宗熙平元年六月青齊光南青四州蚩蚩害稼

顯祖天安元年六月兖州有黑蟻與赤蟻交鬪長六十步廣四寸赤蟻斷頭而死黑主北赤主南十一月劉彧

兖州刺史畢眾敬遣使內屬詔鎮南大將軍尉元納之
大破賊將周凱等

高祖太和十年七月并州治中張萬壽表建興獲澤縣
民賈日成以去四月中養蠶有絲網成幕中有卷物似
絹帶長四尺廣三寸薄上復得黃繭二狀如履形

世宗正始二年三月徐州蠶蛾喫人疋殘者一百一十
餘人死者二十二入

毛蟲之孽

謂變常而為異也

太祖登國中河南有虎七卧於河側三月乃去後一年

蚺蜍白鹿盡渡河北後一年河水赤如血此衛辰滅亡之應及誅其族類悉投之河中其地遂空

孝靜元象元年正月有狼入城至硤石曹疑獲之

武定五年十二月北城銅爵臺上獲豹一

高祖太和元年五月辛亥有狐魅截人髮時文明太后臨朝行多不正之徵也

肅宗熙平二年自春京師有狐魅截人髮人相驚恐六月壬辰靈太后召諸截髮者使崇訓衛尉劉騰鞭之於千秋門外事同太和也

瑞圖外鎮王公刺史二千石令長酷暴百姓人民怨嗟

則白鼠至

太宗永興三年二月京師民趙溫家有白鼠以獻

三年春於北苑獲白鼠一尋死割之腹中有三子盡白

四年三月上幸西宮獲白鼠一

八月御府民張安獲白鼠一

神瑞二年五月帝獵于檻嶺山獲白鼠一平城獲白鼠三

六月平城獲白鼠二

八月豫章王夔獲白鼠一

恭常元年十一月京師民獲白鼠一以獻

二年六月中山獲白鼠二

三年三月京師獲白鼠一

十一月京師獲白鼠一

世目始光三年八月相州魏郡獲白鼠

太延元年八月鴈門獻白鼠

高祖太和二十三年八月京師獲白鼠

世宗景明四年五月京師獲白鼠

正始元年六月京師獲白鼠

肅宗熙平元年四月肆州表送白鼠

靈徵志上第十七

魏書一百一十二

